

摘藻堂四庫全書薈要

史部

欽定四庫全書薈要卷九千三百六十八

史部

文獻通考卷四十八

鄱陽馬端臨貴與著

職官考二

三公總序

四輔二大附

記曰虞夏商有師保有疑丞設四輔及三公

尚書大傳曰古者天

子必有四鄰前曰疑後曰丞左曰輔右曰弼天子有問無以對責之疑有志而不志責之丞可正而不正責之輔可揚而不揚責之弼其不必備惟其人語使能也故爵視卿其祿視次國之君

天子無爵三公無官參職天子何官之稱天文三台以

三公法焉

三台星名
台一作能

伊尹曰三公調陰陽九卿通寒暑

大夫知人事列士去其私周成王作周官曰立太師太

傅太保茲惟三公論道經邦燮理陰陽

師天子所師法
傳傳相天子保

保安天子於德義者此惟三公之任
佐王論道以經緯國事和理陰陽

少師少傅少保曰

三孤

此三公名曰三孤孤孤特也言卑於公尊於卿特置此三人

貳公弘化寅亮天地

弼予一人

副貳三公弘大道化敬信天地之教以輔我一人之治

則三太周之三

公也故不以一職為官名

公八命也九命則分陝為二伯

又以三少為

孤卿與六卿為九馬

六卿冢宰司徒宗伯司馬司寇司空也周禮正義曰按婚義云三公

九卿者六卿并三孤而言九其三公又下兼六卿故傳云司徒公司馬司空公各兼二卿按顧命太保領冢宰畢公領司馬毛公領司空別有芮伯為司徒彤伯為宗伯衛侯為司寇則周時三公各兼一卿之職與古異矣又周禮王畿有六卿每二卿則公一人蓋一公領二卿也舜之於堯伊尹於湯周

公召公於周是其任也

賈誼曰天子不喻於前聖之德不知君民之道不見禮義之正

詩書無宗學業不法太師之責也古者齊太公職之天子不惠於庶民不禮於大臣不中於折獄無經於百官不哀於喪不敬於祭不誠不信太傅之責也古者周公職之天子處位不端受業不敬言語不敘音聲不中進退升降不以禮俯仰周旋不以節此太保之責也古者燕召公職之天子燕業反其學左右之習詭其師益諸

侯過大臣不知文雅之辭此少師之責也天子居處出入不以禮衣服冠帶不以制御器倒側不以度采服從好不以章忿悅不以義與奪不以節此少傅之責也天子居燕私安而易樂而耽飲食不時醉飽不節寢起早晏無常玩好器弄無故周禮建外朝之法左九棘孤卿制此少保之責也

大夫位焉羣士在其後右九棘公侯伯子男位焉羣吏

在其後面三槐三公位焉州長衆庶在其後

樹棘以為位者取其

赤心而外刺象以赤心三刺也槐懷也言懷來人

三公

於此欲與之謀也羣吏謂府史也州長鄉遂之官一命衮若有加賜也不過九命

三公八命矣復加一命則服衮龍與王者之後

同多於此賜也非命服也虞夏之制天子有日月星辰周禮曰諸公之服自衮冕而下如王之服

春秋

九命作伯尊公曰宰言於海內無不宰統焉或說司馬

主天司徒主人司空主土是為三公

韓詩外傳曰故陰陽不和日時不節

星辰失度災變非常則責之司馬君臣不正人道不和國多盜賊民怨其上則責之司徒山陵崩弛川谷不通五穀不植草木不茂則責之司空漢初唯有太傅太尉後加置太師太

保大司徒大司空

哀帝時議以漢舊無司徒故定三公之號曰大司馬大司徒大司空史記

曰公孫弘以春秋白衣為天子三公漢初因秦置丞相而弘為之則丞相為三公矣

王莽居攝置

四輔官

初王莽為左輔甄豐為右弼甄邯為右丞後又制以太師太傅國師國將為四輔位上公大司

馬大司徒大司空為三公

後漢唯有太傅一人謂之上公及有太尉

司徒司空

光武初詔司徒司空二府去大無稱爵

而無師保

董卓盜為太師非漢本制

太尉公主天

部太常衛尉光祿勳

司徒公主人

部太僕鴻臚廷尉

司空公

主地

部宗正少府司農

而分部九卿

漢制三公號稱萬石其俸月各三百五十斛風俗通

云三公一歲共食萬石也

蓋多以九卿為之若天地災變則皆冊免

自太尉徐防始焉

後漢本制日食星流及大雨雹等災變者惟免太尉自徐防為太尉凡天

地災變三公皆免至魏黃初二年始罷此制

漢制三公不與盜賊若領兵入

見皆交戟叉頸而前

使虎賁執刀夾之也魏武為司空破張繡入覲天子亦行此制汗流

洽背自此不復朝覲也

朝臣見三公皆拜天子御座即起在輿為

下凡拜公天子臨軒六百石以上悉會直事卿贊拜御史授印綬公三讓然後受至安帝時三府任薄選舉誅賞一由尚書其災青變咎則責免公台靈帝臨朝始遣使者就長安拜張溫為太尉三公在外自溫始也至獻

帝建安十三年乃罷三公官魏初復置與後漢同

有太傅太

尉司徒司空

然皆無事不與朝政

高柔上疏云今公輔之臣民所具瞻而置之三事不

使知政非朝廷常用大臣之義大臣獻可替否之謂也

初封司空崔林為安陽亭

侯三公封列侯自林始也

林字德孺裴松之曰漢封丞相已為荀悅所譏魏封三公

其失也

黃初二年又分三公戶邑封子弟各一人為列侯

末年增置太保晉武帝即位之初以安平王孚為太宰

鄭冲為太傅王祥為太保義陽王子初為太尉何曾為

司徒荀顗為司空石苞為大司馬陳騫為大將軍凡八

公同時並置惟無丞相焉時所謂八公同辰攀雲附翼

者也遂以太傅太保為上公論道經邦燮理陰陽無其

人則闕蓋居者甚寡

諸公品第一食俸日五斛太康二年又給絹春百疋秋二百疋綿二

百斤元康元年給菜田十頃田騶十人立夏以後不及田者食俸一年又給虎賁二十人特班劍給朝車駕安

車黑耳

其太尉司徒司空自漢歷魏皆為三公及晉迄於

江左相承不改

上公三公之制不改

前代三公冊拜皆設小會所

以崇宰輔之制也自魏末廢而不行至晉拜石鑒

字林伯

為左光祿大夫開府領司徒始有詔令會遂以為常

十六

國姚泓僭號受經於博士淳于岐岐病泓親省疾拜於床下自是公侯見師傳皆拜

宋皆有八公

之官而不言為八公也

宋志曰三公黃閭前史無有義按禮記士鞿與天子同公侯大

夫則異鄭元注云士賤與君同不嫌也夫朱門洞啓當陽之正色也三公之與天子禮秩相亞故黃其閭以示

謙不敢斥天子宜是漢舊制鞿音畢

齊時三公唯有太傅梁有丞相太宰

太傅太保大司馬大將軍太尉司徒司空開府儀同三司等官諸公及從公開府者亦置官屬陳以丞相太宰太傅太保大司馬大將軍並為贈官三公之制開黃閣廳事置鵠尾後魏以太師太傅太保謂之三師上公也大司馬大將軍謂之二大太尉司徒司空謂之三公北齊皆有三師二大三公之官並置府其府三門當中門黃閣設內屏三師二大置佐吏則同太尉府後周置六卿之外又改三師官謂之三公兼置三孤以貳之

少師少傅

少保而以司徒為地官大司馬為夏官司空為冬官如姬

周之制無復太尉三師之號宣帝又置四輔官

以大冢宰越王

盛為大前疑蜀國公尉遲迥為大右弼申國公李穆為大左輔隋國公楊堅為大後丞

隋置三師

不主事不置府僚但與天子坐而論道置太尉司徒司

空以為三公參議國之大事依北齊置府僚無其人則

闕祭祀則太尉亞獻司徒奉俎司空行掃除其位多曠

攝行事尋省府僚佐置公則坐於尚書都省朝之衆務

總歸於臺閣矣煬帝即位廢三師官唐復置三師以師

範一人儀刑四海置三公以經邦論道燮理陰陽

祭祀則與

隋制同

並無其人則闕天寶以前凡三師官雖有其位而

無其人太師太傅太保各一人是為三師太尉司徒司

空是為三公親王拜者不親事祭祀闕則攝

不置官屬

五代

時多以畀藩鎮及贈官

羅紹威

太師

韓建

司徒

馬希範

張全義

安元信

並太師

馮行襲

太傅

宋承唐制以太師太傅太保為三師太尉司徒司空為

三公為宰相親王使相加官其特拜者不預政事赴上

於尚書省

凡除授則自司徒遷太保自太傅遷太尉檢校亦如之

太尉舊在三師

下由唐以來至宋朝加重加以太尉居太傅之上若宰

臣官至僕射致仕者在位久近或已任司空司徒則

拜太尉太傅等官若太師則為異數自趙普以開國元

勲文彥博以累朝耆德方特拜焉雖太傅王旦司徒呂

夷簡各任宰相二十年止以太尉致仕熙寧二年富弼

除守司空兼侍中平章事辭司空侍中從之三年曾公

亮除守司空檢校太師兼侍中以兩朝定策之功辭相

位也六年文彥博除守司徒兼侍中九年彥博除守太保兼侍中辭太保從之元豐三年曹佾為檢校太師守司徒兼中書令九月詔檢校官除三公三師外並罷宋檢校官一十九三公三師三左僕射至水部員外郎共十三官制行左僕射以下為職事官故罷又以

文彥博落兼侍中除守太尉富弼守司徒皆錄定策之功也六年彥博守太師致仕八年王安石守司空曹佾守太保元祐元年文彥博落致仕太師平章軍國重事呂公著守司空同平章軍國重事

舊制將相皆以階官守三師或三公元豐

改官制文彥博常以河東節度使守太師王安石以觀
文殿大學士守司空元祐初彥博罷節度使入為平章
軍國重事即去守字及公著為司空學士院
草制誤存守字是日三省被旨貼麻改正

宗寧三年

蔡京授司空行尚書左僕射大觀元年京為太尉二年
為太師政和二年京落致仕依前太師三日一至都堂
治事九月詔以太師太傅太保古三公之官今為三師
古無此稱合依三代為三公為真相之任司徒司空周
六卿之官太尉秦主兵之任皆非三公並宜罷之仍考
周制立三孤少師少傅少保亦稱三少為次相之任至

是京始以三公任真相三公自祖宗以來罕嘗備官獨宣和末三公至十八人三少不計也太師三人蔡京童貫鄭紳太傅四人王黼燕王俟越王偲鄆王楷太保十一人蔡攸肅王樞至儀王撈渡江後以用兵故秦檜為太師張俊韓世忠為太傅劉光世為太保乾道初楊沂中吳玠並為太傅紹興初史浩為太師嗣秀王為太保蓋自紹興後三公未嘗備官

按三公三師官之濫授莫甚於宣和以來所授者

皆非其人固不待言而名體尤有未正者蓋郢王肅王輩為之是以子為師傅也童貫為之是以廝役為師傅也朝野雜記載嘉定初皇子薨討論贈典吏部引元豐故事欲贈太師尚書令而倪正父引王禹玉等議以為皇子以師傅名官於義未安然不知宣和時皇子已有生為師傅者矣

舊檢校官十有九元豐官制惟存三師後更定官稱三孤亦置檢校以待節度使之久次者加至檢

校少師者文臣則遷開府儀同三司武臣則遷太尉此除授之序也中興以後惟劉光世嘗除檢校至三公後或纔為檢校三孤不必序進徑拜使相若太尉亦有自節度使超進則又不必為檢校官者皆殊恩也按朱熹曰漢初未見孔壁古文尚書中周官一篇說太師傅保為三公但見伏生口授牧誓立政中所說司徒司馬司空遂以為三公而置之豈知諸侯只三卿故止有司徒司馬司空惟

天子方有三公三孤六卿立政所紀周是時方為

諸侯乃侯國制度周官所紀在成王時所以不同
公孤以師道輔君是為加官周公以太師兼冢宰
召公以太保兼宗伯是以加官兼相職也後世官
職益紊遂以公孤官如加官貼職之類不復有師
保之任論道經邦之責矣舊惟文臣有勲德者除
後世或以諸王子或以武臣既曰天子之子與武
臣豈可任師保之責邪訛謬相承不復釐正且祖

宗法除公孤必建節加檢校太子少保少師之類
然後除開府儀同三司然後除公孤南渡如張韓
劉岳諸武臣猶如此今建節後或徑除開府至三
公三孤矣

太師

太師古官殷紂時箕子為之周武王時太公成王時周
公並為太師周公薨畢公代之秦及漢初並無至平帝
元始元年初置以孔光居焉金印紫綬位在太傅上太

保次太傅

孔光為太師王莽為太傅光常稱疾不敢與太后詔令太師無朝賜靈壽杖黃門令為太

師省中坐置几太師入省中坐用杖賜食十
七物十七物者公具十七種物也靈壽木名漢東京又

廢獻帝初董卓為太師卓誅又廢魏世不置晉初置三

公上以景帝諱師故置太宰以代太師之名

晉書曰惠帝大元

年以齊王罔為太師
當是撰述者之誤也

秩增三司

蜀李雄僭號時范長生
自西山乘素輿詣成都

雄拜長生為天地
太師封西山侯

後魏北齊後周隋唐皆有之

天寶以前唯以

其官贈仲尼及長孫楨武曌竇毅韋
元貞張說裴光廷而已曩音憂縛反

五代以畀藩鎮及

贈官

見三公
總序

宋制見總序自祖宗時太師未嘗並除紹聖初始有文
彥博吳榮王顥宣和中蔡京童貫鄭紳靖康初燕王俣
越王偲紹興初秦檜張俊紹熙末史浩嗣秀王伯圭建
隆至紹熙宰臣生拜太師者五趙普文彥博蔡京秦檜
史浩惟蔡秦二人以相臣特拜其他皆還政加恩云親
王生拜太師者五人楚王元佐燕王元儼吳王顥燕王
俣越王偲皆以父兄行而得之紹熙中嗣秀王伯圭以
宗室特拜太師蓋王於光宗為親伯父用優禮也

太傅

太傅古官

傳傳之德義也

周成王時畢公為太傅漢高后元年

初置太傅金印紫綬初用王陵後省八年復置後省哀

帝元壽二年復置位在三公上平帝以孔光為之後漢

有太傅上公一人掌以善道無常職光武以卓茂為之

薨省明帝又以鄧禹為之

鄧禹字仲華以元功拜太傅進見東向又張禹字伯達遷

太傅舍於宮太官進食五日一歸府朝見特贊與三公絕席章帝以趙憙三世在位為國元老乃以為太傅和帝即位幼弱以鄧彪有高名海內歸仁徵為太傅百官總已以聽之恩寵之異莫與為比其後每帝

初即位輒置太傅錄尚書事薨則省

胡廣注曰猶古冢宰總已之義

桓

帝踐阼已加元服不復置傅但令太尉胡廣司徒趙戒
領尚書事至靈帝復以陳蕃為太傅與廣參錄尚書事
魏初置太傅以鍾繇為之晉宋金章紫綬進賢三梁冠
介幘絳朝服佩山元玉梁後魏北齊後周及唐皆有
宋制見總序

太保

太保古官殷太甲時伊尹為太保周成王時召公為太

保漢平帝元始元年始用王莽為之光武中興省魏初

不置末年始置太保以鄭冲為之

冲字文和

位在三司上晉

武初踐阼以王祥為太保進爵為公加置七官之職太

保所以訓護人主導以德義者也

汝南王亮為太宰錄尚書事與太保衛瓘

對掌朝政又衛瓘為太保以公就第置長史司馬從事中郎掾屬也

章綬佩服冠秩與太

傅同梁後魏北齊後周隋及唐皆有之

天寶已前唯以其官贈竇季謀

一人而已

宋制見總序

太宰

太宰於殷為六太於周為六卿亦曰冢宰周武王時周

公始居之掌建邦之治秦漢魏並不置

平帝加王莽號曰宰衡

晉

初依周禮備置三公三公之職太師居首以景帝名師故置太宰以代之而以安平獻王孚居焉增掾屬十人

蓋為太師之互名非周冢宰之任也

何曾為太宰朝會乘輿入朝劍履上

殿如蕭何田千秋鍾繇故事又安帝以太宰瑯琊王德文不宜櫻拂事務以紆論道之重可袞冕之服綠蓋綬羽葆蓋音戾蓋綠也以綠為質蓋草名也宋大明中用出瑯琊平昌縣似艾可染綬因以為綬名

江夏王義恭為之冠綬服秩悉與太傅同至齊以為贈
梁初有之至陳又以為贈有事則權兼之後魏初無至
孝莊時以太尉上黨王天穆為之增置佐吏北齊無聞
後周文帝又依周禮建六官遂置天官大冢宰卿是掌
邦治以建邦之六典佐皇帝治邦國自隋而無

宋崇寧時蔡京得政乃言僕臣之賤非宰相所宜稱於
是改左僕射為太宰右僕射為少宰靖康末詔宰臣依
舊為左右僕射

太尉

太尉秦官

月令曰孟夏太尉贊雋傑自上安下曰尉故武官咸以為號

漢因之

應劭漢官

謂太尉為周官非也鄭元注月令亦曰秦官

金印紫綬掌武事漢文三年省

景帝三年復置其尊與丞相等

丞相衛綰病免上議置丞相太尉藉福說田蚡

曰上以將軍為丞相必讓實嬰嬰為相將軍必為太尉太尉相尊等耳又有讓賢名蚡從之皆如其謀蚡音扶

反粉五年又省元狩四年更名大司馬

大司馬說在本篇

後漢建

武二十七年復舊名為太尉公每帝初即位多與太傅

同錄尚書事府門無闕

論者云王莽以大司馬篡盜神器故貶其闕

掌四方

兵事功課歲盡則奏其殿最而行賞罰凡郊祀之事掌
亞獻大喪則告諡南郊凡國有大造大疑則與司徒司
空通而論之國有過事與二公通諫諍之靈帝末以劉
虞為大司馬而太尉如故自此則大司馬與太尉始並

置矣

劉寵字祖榮遷太尉以日食免又第五倫為會稽太守署鄭弘為都郵舉孝廉及弘為太尉而倫為

司空位在下每朝見弘曲躬自卑帝知其故遂置雲母屏風分隔其間由此以為故事又陳蕃拜太尉臨朝嘆

曰黃憲若在不敢先佩印綬後坐辟召非其人策罷魏亦有之

王祥字休徵為太尉司馬文王進爵

為王祥與司徒何曾司空荀顗並詣王顗曰相王尊重今可相率而拜祥曰相國勢位誠為尊貴然要是魏之

宰相吾等魏之三公公王相去一階而已班列大同安
有天子三公可輒拜人者邪損魏朝之美虧晉王之德
君子愛人以禮吾不為也及入何魯荀顗遂拜祥
獨長揖文王謂祥曰今日然後知君見顧之重也晉太
尉進賢三梁冠介幘絳朝服金章紫綬佩山玄玉若郊
廟冕服七旒玄衣纁裳七章宋制武冠山玄玉齊制九
旒後魏初與大將軍不並置正光之後亦皆置焉歷代
唯後周無其餘皆有悉為三公

宋循歷代之制以太尉與司徒司空並為三公政和時
罷之復周制以太師太傅太保為三公少師少傅少保

為三孤以太尉本秦主兵官定為武階之首正一品在節度使之上建炎三年劉光世始以檢校太保除自後或以檢校三少或以節度使不帶檢校皆徑進太尉則進使相是為除授之序依兩府恩數

石林葉氏曰漢高祖元年以蕭何為丞相周苛為御史大夫五年而後始命盧綰為太尉綰王燕後以命周勃尋省蓋是時高祖方自征伐武事不以屬人亦不必設官也文帝元年周勃遷右丞相以

薄昭為車騎將軍宋昌為衛將軍而不置太尉蓋
自代來未敢以兵權委漢廷舊臣故以其腹心分
領之耳自是虛太尉者二十六年七國反景帝以
周亞夫擊之始復以亞夫為太尉兵罷亦省又十
三年而武帝以命田蚡一年復省又二十一年乃
以大將軍衛青驃騎將軍霍去病為大司馬各冠
其將軍即太尉也蓋方有四夷之功故爾自去病
青死又十九年而霍光以奉車都尉為大司馬大

將軍以此考之太尉官自高祖以來有事則置無
事則省不以為常也蓋漢雖設太尉總兵而左右
前後及因事置名以為將軍者不一豈固不欲以
兵權屬一官邪觀高祖命盧綰武帝命衛霍非親
即舊其意可知矣

司徒

司徒古官少皞祝鳩氏為司徒

司徒主也
徒衆也

堯時舜為司徒

舜攝帝位命禹為司徒禹玄孫之子曰微亦為夏司徒

周時司徒為地官掌邦教

毛詩緇衣篇美鄭武公也父子相繼為周司徒能善於其

職秦置丞相省司徒漢初因之哀帝元壽二年罷丞相

置大司徒後漢大司徒主徒衆教以禮義凡國有大疑

大事與太尉同

蔡質漢儀曰司徒府與蒼龍闕對厭於尊者不敢號府應劭曰此不然丞相舊

位在長安時有四出門隨時聽事明帝東京本欲依之迫於太尉司空但為東西門耳每國有大議天子車駕

親幸建武二十七年去大為司徒公

鄧禹為大司徒封侯年二十四靈帝

賣官廷尉崔烈入錢五百萬以買司徒建安末為相國

其拜日天子亦臨軒時人謂烈為銅臭

魏黃初元年改為司徒

華歆字子魚為司徒家無擔石之儲詔曰司徒國之雋老今大

官重膳而司徒疏食甚無謂也特賜歆及妻男等衣服

晉司徒與丞相通職更置

迭廢未嘗並立永嘉元年始兩置焉

王衍為司徒東海王越為丞相始兩

置也陳壽為司徒仰理萬幾俯澄邦教又王戎字濬仲為司徒高選長史西曹掾委任責成常得無為又蔡謨字道明遷司徒謨固讓曰若我作司徒將為後世哂義不敗拜詔數十下謨表章十餘上陳以疾篤帝臨軒自旦至申而徵不至公卿以蔡公傲無人臣之禮奏送謨廷尉謨率子弟詣闕稽顙詔免為庶人謨每歎曰若使劉王喬得南渡司徒之美
宋制司徒金章紫綬進賢三選也王喬名疇少有重名

梁冠佩山玄玉掌治民事郊祀則省牲視滌濯大喪安梓宮凡四方功課歲盡則奏其殿最而行賞罰亦與丞

相並置齊司徒之府領天下州郡名數戶口簿籍梁罷
丞相置司徒歷代皆有至後周以司徒為地官謂之大
司徒卿掌邦教職如周禮隋及唐復為三公

宋仍唐制政和二年罷

詳見總序

司空

司空古官

孔安國曰司空主穿土以居人
空穴也古者穿土為穴以居人

少皞鵬鳩氏

為司空舜攝帝位以禹為司空

周禮正義曰禹自司空
總百揆乃分司空之職

為共工虞書曰垂作
共工益作朕虞是也

高玄孫之子曰冥亦為夏司空殷

湯以咎單為司空周禮司空為冬官掌邦事秦無司空

置御史大夫漢初因之至成帝綏和元年始更名御史

大夫曰大司空

初改為司空議者又以縣道官有獄司空故復加為大司空亦所以別小大之

也文金印紫綬祿比丞相建平二年復為御史大夫元壽

二年復為大司空

何武字君卿為司空事後母不篤詔冊免之又彭宣字子佩為大司空而

王莽為大司馬專權宣上書曰三公鼎足承君一足不任則覆亂矣臣老病願上印綬

後漢初為

大司空建武二十七年去大為司空公

第五倫字伯魚為司空奉公不

撓言議果決以貞白稱又張敏字伯達為司空行大射禮陪位頓仆冊免又陳寵為司空府故事督屬籍不通

賓客以防交關寵去籍通客以明無所不受論者大之
荀氏家傳曰荀爽字慈明董卓秉政徵之起巖穴九十
五日而為司空時凡營城起邑復溝洫修墳防之事則
號為白衣登三公

議其利建其功四方水土功課歲課歲盡則奏其殿最
而行賞罰凡國有大造大疑諫諍與太尉同獻帝建安

十三年又罷司空置御史大夫郗慮免不復補

荀綽百官志曰

獻帝置御史大夫職如司空不領侍御史

魏初又置司空冠綬及郊廟之服

與太尉同

鄭袤字林叔為司空天子臨軒遣就第拜授表謂使曰魏以徐景山為司空徐公曰三公

上應天心苟非其人實傷和氣固辭見許表莫候反

宋制進賢三梁冠佩山立玉

掌治水土祠祀掌掃除樂器大喪掌將校復土歷代皆

有之至後周為冬官謂之大司空卿

掌邦事以五材九範之徒佐皇帝富

邦國大祭祀行洒掃廟社四望則奉豕牲

隋及唐復為三公

天寶十三載冊拜楊國忠為司

空其日雨土

宋仍唐制政和二年罷

大司馬

大司馬古官也掌武事

司主也馬武也

少皞有鳴鳩氏為司馬

鳴音

堯時棄為后稷兼掌司馬周官司馬為夏官掌邦

政項羽以曹咎周殷並為大司馬

楚大司馬景舍帥軍伐蔡蔡侯奉社稷而

歸之楚發其賞舍辭曰發誠布令而敵退是王威也相攻而敵退是將威也戰而敵退是衆威也臣不宜以衆

威受賞又司馬穰苴本姓田齊威王以古司馬法而附穰苴因號為司馬穰苴漢初不置武帝

元狩四年初罷太尉置大司馬以冠將軍之號

冠者加於其上

為一官也霍光以大司馬大將軍輔政武帝又令大將軍驃騎將軍皆有大司馬之號

宣帝地節

三年置大司馬不冠將軍亦無印綬官屬

霍禹為大司馬冠小冠無

印綬成帝綏和元年初賜大司馬金印紫綬置官屬祿比

丞相去將軍哀帝建平二年復去大司馬印綬官屬將

軍如故元壽二年復賜大司馬印綬置官屬去將軍位

在司徒上

漢律丞相大司馬大將軍俸錢月六萬

始置時議者以漢有軍

候千人司馬官故加大王莽居攝以漢乃無小司徒而

定司馬司空之號並加大後漢光武建武二十七年省

大司馬以太尉代之故常與太尉迭置不並列

吳漢為大司馬

封舞陽侯

至靈帝末始置焉魏文帝黃初二年復置大司馬

以曹仁居之而太尉如故則太尉大司馬大將軍各自

為官位在三司上

吳有左右大司馬

晉定令亦在三司上

晉諸公贊

曰義陽王為太尉大司馬時父子為太宰父子居上公
中代以來未之有也又汝南王亮為大司馬正旦大會
乘車入殿又陳騫為武冠絳朝服金章紫綬佩山玄玉
大司馬賜袞冕之服

與大將軍同宋時唯元嘉中用彭城王義康為之冠玉
與晉同至齊以為贈梁時置官屬陳以為贈後魏北齊
與大將軍為二大位居三師之下三公之上後周為夏

官謂之大司馬卿

掌邦政以建邦國之九法佐皇帝平
邦國大祭祀掌其宿衛廟社則奉羊

牲自隋而無

三孤

周成王立少師少傅少保曰三孤貳公弘化寅亮天地

弼予一人

注孤特也言其卑於公尊於卿周禮孤卿特揖其位東面來夏篆謂五采畫黻服希冕執

皮帛又公之孤四命注九命上公得置孤一人春秋時隨楚皆有少師

秦漢而下省後周

置三孤以貳三公

宋沿唐制置三師以太尉司徒司空為三公至徽宗政和二年詔司徒司空周六卿之官非三公之任乃今之六曹尚書是也太尉秦官居主兵之任亦非三公太尉司徒司空並罷依周制立三孤之官乃次輔之任或稱

三少為次相之任

餘見三公總序

總叙三公三師以下官屬

三師

太師太傅太保歷代多有之

一太

殷建官有六太其一曰太宰自周以後亦常有之餘五太

則三公

太尉司徒司空歷代有之

二大

大司馬大將軍歷代亦有之

諸位從公

將

軍及光祿大夫開府者歷代亦時有之

官屬等

歷代有置有省亦多同說所以不更各具本府但依

時代都言之其大將軍自具本篇

漢有三師而不見官屬以丞相為公

置司直長史後改丞相為司徒則曰司徒司直長史

具宰

相其太尉後改為大司馬綏和初始置長史一人掾屬

二十四人御屬一人令史二十四人改御史大夫為大

司空置長史加中丞

具御史大夫篇

後漢初唯置太傅有長史

一人掾屬十人御屬一人

不知何曹

後置太師董卓嘗居之

蓋自為也而不見官屬太尉屬官有長史一人署諸曹

事

盧植禮注曰如周小宰

掾吏屬二十四人

分主二千石長史遷除遷民戶祠祀農桑

奏議詞訟郵驛轉運盜賊罪法兵貨幣鹽鐵倉穀等事

黃閣主簿

省錄衆事掌閣下威儀

記

室令史

掌上章表報後漢末陳琳阮瑀皆為曹公記室軍國書檄皆所作

御屬

掌為公卿閣下

威儀司徒屬官有長史一人掾屬三十一人令史及御屬

三十六人

正曰掾副曰史陳寵辟司徒鮑昱府是時三府掾屬專尚交遊以不肯親事為高寵獨勤

心物務轉為辭曹專掌天下獄訟時司徒辭訟久者數十年事類溷錯易為輕重寵為昱撰辭訟比七卷決事科條皆以事相從昱奏上之其後公府奉以為法

司空屬官長史一人掾屬二

十九人令史及御屬三十二人

正曰掾副曰屬漢書注云公府掾比古元士三

命者也或曰漢初掾史辟皆上言之故有秩皆比命士其所不言則為百石屬其後皆自辟除故通為百石云

其大司馬屬官並同前漢魏置太傅太保而不見官屬

太尉司徒司空有長史司馬從事中郎正行參軍大司

馬亦有正行參軍也晉有太宰太傅太保唯楊駿為太

傳增祭酒為四人掾屬二十人兵曹為左右也

楊駿輔政引潘

岳為太傳主簿

太宰太保官屬不見太尉司徒司空並有長史

司馬太尉雖不加兵者吏屬皆絳服太始三年又置太尉軍參軍六人騎司馬五人官騎十人而司徒加置左長史長差次九品銓衡人倫冠綬與丞相長史同主簿左右東西曹掾各一人若有所循行者增置掾屬十人

武帝時司徒奏州郡農桑未有賞罰之制宜遣掾屬循行詔遂使司徒督察州郡播殖若有所循者增掾屬十人又溫嶠請司徒置田初王渾字元遷司徒仍加兵渾曹屬州一人勸課農桑

以司徒文官主吏不持兵及吏屬絳衣自以非是舊典
皆令皂服論者美其謙而識理司空府加置導橋掾一
人餘畧同後漢咸寧初詔以前太尉府為大司馬府增
置祭酒二人帳下司馬官騎大車鼓吹左右光祿光祿
三大夫開府者皆為位從公品秩俸賜儀制與諸公同
加兵者增置司馬一人從事中郎二人

劉琨為司空以
盧諶為從事中

郎主簿記室督各一人舍人四人兵鎧士曹營軍刺姦

帳下都督外都督令史各一人

主簿以下令史
以上皆絳服

司馬給

吏卒如長史從事中郎給侍二人主簿記室都督各給侍一人其餘臨時增崇者則褒加各因其時為節文不為定制

其祭酒掾屬白蓋小車七軺車施耳後戶皂輪犢車各一乘自祭酒以下令史以上皆皂零辟

朝服其為持節都督者增參軍為六人其餘如常加兵公

制孫楚字子荆為佐著作郎參石苞驃騎軍事楚既負其才氣頗侮易苞初至揖曰天子命我參卿軍事初

參軍不敬府主楚既輕苞遂制施敬自楚始也宋有太傅太保太宰太尉司徒

司空大司馬諸府皆有長史一人將軍一人又各置司

馬一人而太傅不置長史掾屬亦與後漢畧同自江左

以來諸公置長史倉曹屬東西閤祭酒各一人主簿舍
人二人御屬二人令史無定員領兵者置司馬一人從
事中郎二人參軍無定員加崇者置左右長史司馬從
事中郎四人掾屬四人則倉曹增置屬戶曹置掾加崇
極於此也其司徒府若無公唯省舍人其府常置其職
僚異於餘府有左右長史東西曹掾屬餘則同矣餘府
有公即置無則省齊有太宰大司馬並為贈官無僚屬
太尉司徒司空是為三公特進位從公諸開府儀同三

司位從公開府儀同如公凡公督府置位長史司馬一人諮議參軍二人諸曹有錄事功曹記室戶曹倉曹中直兵外兵騎兵長流賊曹城局法曹田曹水曹鎧曹集曹右戶十八曹局曹以上署正參軍法曹以下署行參軍各一人其行參軍無署者為兼員其公府佐吏則從事中郎二人倉曹掾戶曹屬東西閤祭酒各一人主簿舍人御屬二人加崇者則左右長史四中郎掾屬並增數其未及開府則置亦有佐吏其數有減小府無長流

置禁防參軍初晉令公府長史著朝服自宋大明以來

著朱衣

齊王儉為司徒左長史請依晉令復舊制不著朱衣時議不許又曰王秀之常云位至司徒左

長史可以知止足矣又陸慧曉為司徒右長史謝朓為左長史府公竟陵王子良謂王融曰我府二上佐前代

誰可比融曰兩賢同侍未有前例

梁武受命之初官班多同宋齊之舊

有丞相太宰太傅太保大司馬太尉司徒司空開府儀

同三司等官諸公及位從公開府者置官屬有長史司

馬諮議參軍掾屬從事中郎記室

建安王為雍州表求管記以江革為征北

記室參軍革弟觀又為參軍兼記室任昉曰文房之任總卿兄弟故歷代皆為文士之華選云主簿列

曹參軍行參軍舍人等官其司徒則有左右二長史

褚球

字仲寶為司徒左長史加貂台佐加貂自球始也

又增置左西掾一人自餘僚

佐同於二府有公則置無則省而司徒無公唯省舍人
餘官常置開府儀同三司位次三公左右光祿大夫優
者則加之曰三公置官屬陳三師二大並為贈官而無
僚屬其三公有府長史司馬諮議參軍從事中郎掾曹
屬主簿祭酒錄事記室正參軍板參軍後魏三師無官
屬後又置太宰以元天穆為之增置佐吏三公及二大

並有長史司馬諮議參軍從事中郎掾屬主簿錄事參

軍功曹記室戶曹中兵等參軍諸曹行參軍祭酒參軍

事長兼行參軍督護

其太尉司徒與二大屬官階同唯司空府官每降一階

北齊

三師二大三公各置長史司馬諮議參軍從事中郎掾

屬主簿錄事功曹記室戶曹倉曹中兵騎兵長流城局

刑獄等參軍事東西閤祭酒及參軍事法墨田水鎧集

士等曹行參軍督護等員

司徒則加左右長史

長史

主吏

司馬

主將

舍

人主閤內事皆自秦官也從事中郎

從事中郎漢末官也陳湯為大將軍王鳳從事

中郎在主簿上所掌秩與長史同

掾屬

主諸曹事

主簿

所主與舍人同祭酒所主亦同

令史

主諸曹文書

此皆自漢官也

陳湯為大將軍王鳳從事中郎是也

御屬參軍自

後漢

孫堅參驃騎軍事是也參軍所主與掾屬同

其儀同三司如開府者亦

置長史以下官屬而減記室倉城屬田水鎧士等七曹

各一人

其品亦下三公府一階其三師二大佐吏則同太尉府也

後周以太師太傅

太保為三公而不見僚屬隋三師亦不見官屬而三公

依北齊置府僚後省府及僚佐置公則坐於尚書都省

朝之衆務總歸於臺閣唐三師三公並無官屬

宋亦如之

文獻通考卷四十八



總校官庶吉士臣張能照

校對官檢討臣郭寅

謄錄監生臣劉垠

欽定四庫全書薈要

史部

文獻通考卷

四十九
五十

詳校官員外郎臣潘紹觀



欽定四庫全書薈要卷九千三百六十九

史部

文獻通考卷四十九

鄱陽馬端臨貴與著

職官考三

宰相

黃帝得六相而天地治神明至

黃帝得蚩尤而明天道得太常而察地理得蒼

龍而辨東方得祝融而辨南方得風后而辨西方得后土而辨北方謂之六相

虞舜臣堯

為堯時臣

舉八愷

倉舒殯欽禱戲大臨庀降庭堅仲容叔達為八愷即垂益禹皋陶之倫也庭堅則皋陶字殯六

回切數千來切

使主后土

后土地官也

以揆百事莫不時叙地平天

成

揆度成平也

舉八元

伯奮仲堪叔獻季仲伯虎仲熊叔豹季狸為八元

使布五教

於四方內平外成

內諸夏外夷狄

謂之十六相

亦曰十六族

及殷成

湯居亳初置二相以伊尹仲虺為之

伊尹號為阿衡阿倚也衡平也湯倚

伊尹而取平故以為官名仲虺臣名為湯左相以諸侯而相天子者也左傳稱居薛為湯左相

武丁得

傅說爰立作相王置諸其左右

武丁殷之高宗也使百官以所夢之形象經營

求之于野外得賢相傅說於傅巖之谿於是禮命立以為佐相使在左右也

周時召公為保

周公為師相成王為左右亦其任也秦悼武王二年始

置丞相官以樗里疾甘茂為左右丞相

茂為左疾為右

莊襄王

又以呂不韋為丞相及始皇立尊不韋為相國則相國

丞相皆秦官

又漢官儀云皆六國時官

金印紫綬掌承天子助理萬

機秦初有左右

荀悅曰秦本次國命卿二人是

至二世

復有中丞相

二世時右丞相去疾左丞相斯及斯被誅乃以趙高為中丞相事無大小皆決之

漢高帝即位一丞相綠綬

高帝元年拜曹參為假左丞相即漢初丞相當有左右令

言一丞相或漢書之誤

以蕭何為之及誅韓信乃拜何為相國何

薨以曹參為之孝惠高后置左右丞相文帝二年復置

一丞相丞相月俸錢六萬

初陳平為左丞相及誅諸呂文帝初立平乃謝病以讓周

勃乃以勃為右丞相位第一平為左丞相位第二帝因問勃天下一歲決獄幾何勃謝不知問天下錢穀一歲出入幾何勃又不能對汗出洽背及問平平曰有主者宰相者上佐天子理陰陽順四時下遂萬物之宜外鎮四夷諸侯內親附百姓使卿大夫各任其職上善之勃謝病請免相平專為一丞相成帝綏和元

年御史大夫何武建言古者民謹事約國之輔佐必得

賢聖然猶則天三光備三公官

三光日月星

各有分職今末

俗之弊政事煩多宰相之才不能及古而今丞相獨兼三公之事所以大化久未洽也宜建三公官定卿大夫

之位分職分政以考功效於是上拜曲陽侯王根為大
司馬而何武自御史大夫改為大司空皆金印紫綬比
丞相則三公俱為宰相漢御史大夫副丞相事若今之
同平章事及參知機務之類所
以漢書云薛貢韋匡迭為宰相薛宣韋賢匡衡則是丞
相而貢禹但為御史大夫又蕭望之謂朱雲曰吾備位
將相蓋蕭望之嘗任御史大夫及前將軍之職也

至孝哀帝建平二年正月從

朱博議復罷大司空

大司空朱博奏曰帝王之道不必
相襲高祖置御史大夫次丞相典

正法度以職相參歷載二百天下安寧今更大司空與
丞相同位故事選郡國守相高第為中二千石為御史
大夫任職者為丞相位次有序所以重聖德重國相也
今中二千石未更御史而為丞相非所以重國政也今

願罷大司空以御史大夫為百寮長哀帝從之元壽二年更名丞相為大司徒

初漢制常以列侯為相唯公孫弘布衣數年登相位武

帝乃封為平津侯其後為故事至丞相而封自弘始也

到光武絕不復侯或自以際會援立見封漢儀注曰御史大夫為丞相更春乃封故且賜爵關內侯李奇曰以

冬月非封侯故且白事教令稱曰君侯亦謂丞相為工

先賜爵關內侯曰足下位為春秋之義尊上公謂之宰言海內無不統

上相是也馬故丞相進天子御座為起在輿為下

皇帝見丞相起謁者贊稱曰皇

帝為丞相起起立乃坐贊稱曰敬謝行禮皇帝在道丞相某迎謁者稱曰皇帝為丞相下輿下立乃升車也

丞相有病皇帝法駕親至問疾從西門入

丞相有疾御史大夫三朝

問起居百寮亦然後漢三公疾令中黃門問疾魏晉即黃門郎尤重者或侍中

及瘳視事尚書

令若光祿大夫賜以養牛上尊酒

如淳曰律稻米一斗得酒一斗為上尊兩

吉為丞相尚寬大好禮儀掾吏有罪不稱職與長休終告無案驗客或曰君侯為漢相姦吏成其私然無所懲艾乎吉曰夫以三公之府有按吏之名吾竊陋焉因為故事公府不按吏自吉始韋賢為丞相年七十餘乞罷歸私第丞相致仕自賢始也有天地大變天下大過則以病聞有天地大變天下大過皇帝使侍中持節乘四白馬賜上尊酒十斛牛一頭策告殃咎使者居半道丞相追上病使者還來白事尚書以丞相不起病聞若丞相不勝任使者策書駕駱馬即時布衣步出府免為庶人若丞相有他過使者奉策書駕驢驪馬即時步出府

乘棧車北馬歸田凡丞相府門無闌不設鈴鼓言其大

里思過驪京媚切應劭曰丞相舊位在長安時府有四出門

開無節限也隨時聽事國每有大議天子車駕親幸

後漢廢丞相及御史大夫而以三公綜理衆務則三公

復為宰相矣前代丞相有倉頭字宜祿至漢代有所闕

至於中年以後事歸臺閣則尚書官為機衡之任至獻

帝建安十三年復置丞相而以曹公居之又有相國魏

黃初元年改為司徒吳有左右丞相而文帝復置中書監令並

掌機密自是中書多為樞機之任說在中書令篇其後定制置

大丞相第一品後又有相國齊王以司馬師為之

晉景帝

高貴鄉公以司馬昭為之

晉文帝

晉初並不置

武帝初安平王孚為

太宰鄭冲為太傅王祥為太保義陽王子初為太尉何曾為司徒荀頴為司空石苞為司馬陳騫為大將軍凡八公同時並置唯無丞相焉

至惠帝永康元年改司徒為丞相永寧

元年罷丞相復置司徒官永昌元年罷司徒并丞相則

與司徒不並置矣

丞相與司徒廢置非一

其後或有相國或有丞

相省置無恒而中書監令常管機要多為宰相之任自

魏晉以來相國丞相多非尋常人臣之職

晉趙王倫梁王彤成都王

穎南陽王保並為之元帝渡江以王敦為丞相轉司徒荀組為太

尉以司徒官屬并丞相為留府敦不受成帝以王導為

丞相罷司徒府為丞相府導薨罷丞相復為司徒府相

國丞相皆袞冕綠盞綬

盞音吏

宋孝武帝初唯以南郡王

義宣為丞相而司徒府如故亦有相國丞相金章紫綬

進賢三梁冠絳朝服佩山元玉相國則綠元綬也齊丞

相不用人以為贈官梁罷相國置丞相罷丞相置司徒

陳又置相國位列丞相上并丞相並為贈官按自魏晉

以來宰相但以他官叅掌機密或委知政事者則是矣
無有常官其相國丞相或為贈官或則不置自為尊崇
之位多非人臣之職其真為宰相者不必居此官

魏文帝以

劉放孫資為中書監令並掌機密晉武帝詔以荀勗為
中書監侍中毗贊朝政張華為中書令侍中劉卞謂華
曰公居阿衡之地東晉庾亮庾冰相次為中書監先是
王導輔政以寬和得衆庾亮以法裁飭頗失人心至冰
經綸時務升擢後進朝野注心咸曰賢相殷浩為揚州
刺史參綜朝權王敦為大將軍侍中上表曰臣備位宰
輔謝安為中書監錄尚書省事宋文帝初徐羨之為司
空錄尚書事後以江湛王僧綽俱為侍中任以機密後
又以殷景仁為侍中左衛將軍與侍中右衛將軍王華
侍中左衛將軍王曇首侍中劉湛四人俱居門下皆以

風力局幹冠冕一時同時之美近代莫及初王弘為江州刺史加侍中後徵輔政以為侍中司徒錄尚書事而弘弟曇首為文帝所任與華相持華常謂己力用不盡每歎息云宰相須有數人天下何由得理湛母憂去職後徵為太子詹事加給事中與殷景仁並被任遇湛常云今代宰相何難此正可當我南陽郡漢代功曹耳沈演之為侍中衛將軍文帝謂之曰侍中領衛俱為優重此蓋宰相便坐卿其勉之齊王儉為侍中尚書令常謂人曰江左風流宰相惟有謝安蓋自況也明帝顧命江祐兄弟及始安王遙光尚書令徐孝嗣領軍蕭坦之更日貼敕時呼為六貴皆宰相也梁何敬容初為吏部尚書侍中時徐勉為僕射參掌機事以疾陳解因舉敬容自代故敬容遷為僕射掌選事侍中如故此並為宰相後敬容屢轉他官而參掌如故又王訓為侍中武帝問敬容曰褚彥回彥回年幾為宰相對曰少過三十帝曰今之王訓無謝彥回彥回宋明帝時為侍中又周舍卒後朱

并為散騎常侍代掌機密北齊韓軌為中書令尋授司空自以勲歷登台鉉按此則或掌機密或錄尚書或綜機權或管朝政或單侍中或給事中或受顧命皆為宰相也然侍中職任機密之司不必他名亦多為宰相其侍中兼外官若宋王弘侍中兼內官若沈演之其例不少則非宰相蓋在當時委任而已自晉宋以來宰相皆文武自逸何敬容獨勤庶務為代所嗤鄙姚察曰魏正始及晉之中朝俗尚於玄虛貴為放誕尚書丞郎以上簿領文案不復經懷皆成於令史逮乎江左此道彌扇唯卞壺以臺閣之務頗欲綜理阮孚謂之曰卿常無閒暇不乃勞乎宋代王敬弘身居端右未嘗省牒風流相尚其流遂遠覩白署空是稱清貴恪勤匪懈終滯鄙俗是使朝經廢於上衆職墮於下小人道長抑此之由也嗚呼傷風敗俗而使何敬容之識理見譏薄俗者哉

後魏舊制有大將軍不置太尉有丞相不置司徒自正

光以後俱始置之

神瑞元年置八大人官總理萬機時號八公

然而尤重門

下官多以侍中輔政則侍中又為樞密之任矣

說在侍中篇

北齊乾明中置丞相河清中中分為左右各置府僚

統天

三年以太宰段韶為左丞相太師賀拔仁為右丞相又斛律金斛律光並由右丞相轉拜為左丞相

然而

為宰相秉朝政者亦多為侍中

趙彥琛元文遙和士開同為宰相皆兼侍中

後周大冢宰亦其任也其後亦置左右丞相大象二年

以楊堅為大丞相遂罷左右丞相官隋有內史納言

即中

書令侍中也

是為宰相亦有他官參與焉

柳述為兵部尚書參掌機事又楊素

為右僕射與高
頗專掌朝政

按自後漢時雖置三公而事歸臺閣尚書始為機
衡之任然當時尚書不過預聞國政未嘗盡奪三
公之權也至魏晉以來中書尚書之官始真為宰
相而三公遂為具員其故何也蓋漢之典事尚書
中書者號為天子之私人及叔季之世則姦雄之
謀篡奪者亦以其私人居是官而所謂三公者古
有其官雖鼎命將遷之時大權一出於私門然三

公未容遽廢也故必擇其老病不任事依違不侵
權者居之東漢之末曹公為丞相而三公則楊彪
趙溫尚書令中書監則二荀華歆劉放孫資之徒
也魏之末司馬師昭為丞相而三公則王祥鄭冲
尚書令中書監則賈充荀勗鍾會之徒也蓋是時
凡任中書者皆運籌帷幄佐命移祚之人凡任三
公者皆備員高位畏權遠勢之人而三公之失權
任中書之秉機要自此判矣至丞相一官西漢廢

於哀帝之時東漢本不置丞相建安特置之以處
曹操魏本不置丞相正始特置之以處司馬師昭
及晉則不置正符堅所謂朕以龍驤建業之說也
然東晉以至宋齊梁陳隋皆有之夫中書監既為
宰相之任則升其品秩可也丞相既不為宰相之
任而嘗為擅代之階則廢其名字可也今觀魏以
後之官品中書監僅為三品而黃鉞大將軍大丞
相諸大將軍則為一品二品然此數官者未嘗以

授人特宋齊梁陳隋將受禪則居之此外則王敦
桓溫侯景亦嘗為之夫高官極品不以處輔佐之
臣而又存其名字使亂臣賊子遞相承襲以為竊
取大物之漸非所以昭德塞違明示百官也

唐世宰相名尤不正初唐因隋制以三省之長中書令
侍中尚書令共議國政此宰相職也其後以太宗嘗為
尚書令臣下避不敢居其職由是僕射為尚書省長官
與侍中中書令號為宰相其品位既崇不欲輕以授人

故常以他官居宰相職而假以他名自太宗時杜淹以吏部尚書參議朝政魏徵以秘書監參預朝政其後或曰參議得失參知政事之類其名非一皆宰相職也貞觀八年僕射李靖以疾辭位詔疾小瘳三兩日一至中書門下平章事而平章事之名蓋始起於此其後李勣以太子詹事同中書門下三品謂同侍中中書令也而同三品之名蓋起於此然二名不專用而他官居職者猶假他名如故自高宗已後為宰相者必加同中書門

下三品雖品高者亦然惟三公三師中書令則否其後
改易官名而張文瓘以東臺侍郎同東西臺三品同三
品入銜自文瓘始永淳元年以黃門侍郎郭待舉兵部
侍郎岑長倩等同中書門下平章事平章事入銜自待
舉等始自是以後終唐之世不能改初三省長官議事
於門下省之政事堂其後裴炎自侍中遷中書令乃徙
政事堂於中書省開元中張說為相又改政事堂號中
書門下列五房於其後一曰吏房二曰樞機房三曰兵

房四曰戶房五曰刑禮房分曹以主衆務焉宰相事無
不統故不以一職名官自開元以後常以領他職實欲
重其事而反輕宰相之體故時方用兵則為節度使時
崇儒學則為大學士時急財用則為鹽鐵轉運使又其
甚則為延資庫使至於國史太清宮之類其名頗多皆

不足取

侍中中書令是真宰相其餘但加同中書門下三品及平章事知政事參知機務等名者皆是

自先天之前其員頗多景龍中至十餘人開元以來常

以二人為限或多則三人

武太后聖歷三年四月勅同中書門下三品平章事賜會

並同中書門下三品例開元十年十一月勅自今以後
中書門下宜共食實封三百戶二十二年十一月制宰
相兼官者並
兩給俸祿天寶十五載之後天下多難勲賢並建故

備位者衆然其秉鈞持衡亦一二人而已

舊例起居舍人及起居郎

唯得對仗承旨仗下之後謀議不得聞武太后時文昌
右丞姚璹以為帝王謨訓不可無紀若不宣自宰相史
官無從而知表請仗下所言軍國政要則宰相一
人撰錄每月封送史館謂之時政記自璹始也

德宗時常袞為相奏貶中書舍人崔祐甫為潮州刺

史上以為太重貶祐甫河南少尹初肅宗之世天下

務殷宰相常有數人更直決事或休沐各歸私第詔

直事者代署其名而奏之自是踵為故事時郭子儀
朱泚雖以軍功為宰相皆不預朝政衮獨居政事堂
代二人署名奏祐甫既貶二人表言其非罪上問卿
向言可貶今云非罪何也二人對初不知上初即位
以衮為欺罔大駭乃貶衮為潮州刺史以祐甫為門
下侍郎同平章事

宋承唐制以同平章事為宰相之職無常員有二人則
分日知印以丞郎以上至三師為之其上相為昭文館

大學士監脩國史其次為集賢殿大學士或置三相則

昭文集賢兩學士并監脩國史並除焉

國初范質昭文學士王溥監修

國史魏仁浦集賢學士此三相例也唐以來三大館皆宰臣兼之宋仍唐制

參知政事掌副

宰相毗大政參庶務其除授不宣制不押班不知印不

預奏事不升政事堂殿庭別設磚位於宰相後及勅尾

署銜降宰相一等

乾德二年以趙普為相上欲為普置副而難其名稱問陶穀下丞相一等

何官穀引唐參知政事為對時薛居正為樞密直學士呂餘慶為兵部侍郎乃命二人以本官兼不宣制押班

蓋未欲遽令與普齊也史臣曰按唐參預朝政參知政事等職皆宰相任也高宗嘗欲用郭待舉參知政事復

以其資淺止令同承受平章事
則平章亞於參政矣穀言失之
至道元年詔宰相與參

政輪班知印同升政事堂二年詔復如舊制

參政押勅齊銜行並

馬自寇準始至今不易

親王樞密使留守節度使兼中書令侍中

同平章事者謂之使相不預政事不書勅惟宣勅除授

者勅尾存其銜而已

乾德二年范質等三相皆罷以趙普同平章事李崇矩為樞密使命

下無宰相書勅使問翰林陶穀穀謂自昔輔相未嘗虛位唯唐太和中甘露事數日無宰相時左僕射令狐楚

等奉行制書今尚書亦南省長官可以書勅實儀曰穀所陳非承平令典今皇弟開封尹同平章事即宰相之

任也可書
神宗新官制於三省置侍中中書尚書二令
勅上從之

而不除人而以尚書令之貳左右僕射為宰相左僕射

兼門下侍郎以行侍中之職右僕射兼中書侍郎以行

中書令之職復別置中書門下侍郎尚書左右丞以代

參知政事中書揆而議之門下審而覆之尚書承而行

之獨中書取旨而門下尚書之官為首相者不復與朝

廷議論

時王珪蔡確俱為宰相確奏三省長官位高恐不須設遂以兩僕射行三省事而確為次相專

政珪不復預

元祐初司馬光乃請令三省合班奏事分省治

事自紹興以後皆因之時議者謂門下相凡事既同進

呈則不應自駁已行之命是省審之職可廢也政和中
改左右僕射為太宰少宰仍兼兩省侍郎靖康中復為
左右僕射馬建炎三年呂頤浩請參酌三省之制舊尚
書左僕射今欲尚書左僕射同中書門下平章事舊尚
書右僕射今欲尚書右僕射同中書門下平章事門下
中書二侍郎並改為參知政事廢尚書左右丞從之至
乾道八年詔尚書左右僕射可依漢制改作左右丞相
詳定勅令所言近承詔旨改左右僕射為左右丞相令

刪去侍中中書尚書令以左右丞相充緣舊左右僕射
非三省長官故為從一品今左右丞相係充侍中中書
尚書令之位即合為正一品從之丞相官以太中大夫
以上充參政以中大夫以上充常除二員或一員嘉泰
三年始除三員故事丞相謁告參預不得進擬惟丞相
未除則參預輪日當筆多不踰年少纔旬月獨淳熙初
葉衡罷相龔茂良行相事近三年亦創見也

按以三省為宰相之司存以三省長官為宰相之

職任其說肇於魏晉以來而其制定於唐然中書
尚書之名始於漢通典言漢武帝遊宴後庭始令
宦者典事尚書為之中書謁者則中書尚書只是
一所然考霍光傳光薨霍山以奉車都尉領尚書
事故事諸上書者皆為二封署其一曰副領尚書
者先發之所言不善屏去不奏魏相請去副封以
防壅蔽而光夫人顯及禹山雲等言上書者益黠
盡奏封事輒下中書令出取之不關尚書則其時

中書尚書似已分而為二蓋尚書在漢時乃御前
管文書之所故漢人上書言昧死上言尚書如丞
相大將軍已下連名奏太后廢昌邑王亦是尚書
令讀奏武帝雖令宦者典其事然其末年以霍光
出入禁闥謹慎可屬大事輔少主則以光領之光
薨而山繼領其事蓋既以大臣之秉政者領之則
其事始在外庭矣然則所謂上書者為二封意正
本則徹中書而人主閱之副本則徹尚書而大將

軍閥之自此始判而為二而有內外之分此顯禹
所以有中書令出取之不關尚書之說歟霍氏既
敗張安世復以大司馬車騎將軍領尚書事史言
安世職典樞機謹慎周密每定大政已決輒移病
出聞有詔令乃驚使使之丞相府問焉蓋霍光領
尚書之時丞相乃蔡義楊敞也張安世領尚書時
丞相乃魏相丙吉也是時尚書雖在外庭以腹心
重臣領之然於宰相並無干預此安世所以密議

大政及出詔令而佯為不知遣使問之丞相府則

丞相府乃宣行尚書所議之政令耳而尚書非丞

相之司存也

漢丞相府有東曹西曹為處掾屬議政令之地於尚書並無干預

至

魏明帝常卒至尚書門陳矯為尚書令跪問欲何

之帝曰欲案行文書然則魏時尚書猶去禁中不

遠及唐初始定制以三省為宰相之司存以三省

長官為宰相之職任然省分為三各有所掌而其

官亦復不一相職既尊無所不統則不容拘以一

職於是始有同中書門下三品同平章事參知機

務參預政事之名焉諸名之中所謂同平章事者

唐初雖以稱宰相乃以處資淺之人在參知政事

之下

見前參政注

中世以後則獨為真宰相之官至宋

元豐以前皆然然宰相者總百官弼天子既不當

儕之他官而其上則不當復有貴官矣自唐開元

以來郭子儀李光弼相繼以平章事為節度使謂

之使相而宰相之職儕於他官自此始自宋元祐

以後文潞公呂申公相繼以平章軍國重事序宰

臣上而宰相之上復有貴官自此始然郭李以勲
臣名將為之宜也自此例一開於是田承嗣李希
烈之徒俱以節鎮帶同平章事者非一人極而至
於王建馬殷錢鏐之輩蠱起盜地者皆欲效之蓋
鄙他官而不為而必欲儕於宰相以自附於郭李
則唐中葉以後所謂平章者如此文呂以碩德老
臣為之宜也自此例一開於是蔡京王黼相繼以

太師總知三省事三日一朝赴都堂治事以至於
韓侂冑賈似道擅權專政之久者皆欲效之蓋卑
宰相而不屑為而必求加於相以自附於文呂則
宋中葉以後所謂平章者如此蓋平章之始立名
也本非甚尊之官及其久也則強藩之竊地者為
之權臣之擅政者為之蓋雖官極尊而居之者多
非其人矣

宰相屬官

丞相司直漢武帝五年置掌佐丞相舉不法位在司隸

校尉上翟方進為司直旬歲間免兩司隸

旬歲猶言滿歲若十日之

周一後漢罷丞相光武以武帝故事置司徒司直居司徒

府助司徒督錄諸州郡所舉上奏司直考察能否以徵

虛實建武十一年省獻帝建安八年復置司直不屬司

徒掌督中都官不領諸州九年詔司直皆比司隸校尉

坐同席在上假傳置也

伏湛字惠公光武以湛才任宰相拜為司直行大司徒事後

無

石勒置都部從事各部一州秩二千石准丞相司直

丞相長史漢文帝二年置一丞相有兩長史

漢百官表云丞相有

兩長史而張湯傳云殺臣者三長史也顏師古云兼有守者非正員故耳

蓋諸史之長也職

無不監

田仁為宰相長史上書言天下太守皆下吏誅死武帝悅拜仁為丞相司直威振天下

介

幘進賢一梁冠朱衣銅印黃綬劉屈氂為左丞相分丞

相長史為兩府以待天下遠方之選

待得賢人當拜為右丞相

後漢

建武中省司直有長史一魏武為丞相置左右長史

丞相諸曹吏掾屬三十御屬一獻帝建安中魏武為丞

相置徵事二人

建安十五年初置徵事二人以郗原王烈選補之

舊有東西曹

自魏武大軍還鄴乃省西曹

時毛玠為東曹掾與崔琰並典選舉請謁不行時人

憚之及議併省咸欲省東曹皆曰舊西曹為上東次之宜省東曹也魏武知其情令曰日出於東月盛於西凡

人言方亦復先東遂省西曹

及咸熙中司馬昭為相國相國府置中

衛驍騎二將軍左右長史司馬從事中郎主簿舍人參

軍東西曹及戶賊金騎兵車鎧水集法奏倉士馬媒等

曹掾屬凡四十二人晉元帝以鎮東大將軍為丞相丞

相府置從事中郎分掌諸曹有錄事中郎度支中郎三

兵中郎其參軍則其諮議參軍二人主諷議事江左初

置軍諮祭酒有錄事記室東曹西曹等十三曹其後又置七曹宋武帝為相合中兵直兵置一參軍曹則猶二也

其小府不置長流參軍者置禁防參軍蜀丞相諸葛亮有行參軍晉太傅司馬越府又有行參軍兼行參軍後漸加長兼字除拜則為參軍事府版則為行參軍晉宋以來參軍各有除版行參軍下則長兼行參軍

又有參軍督護東曹督護二督護江左置

尚書都司隋置左右司郎中各一人掌都省之職唐武

德省員觀復置掌副左右丞所管諸司事

二十三曹呼左右司為都

公龍朔改為左右承務咸亨中復為左右司郎中武后

又增員外郎一人

宋熙寧時詔中書五房各置檢正二員

在堂後官之上

都檢正

一員

在五房提點之上皆士人為之

元豐五年罷檢正職務分歸中書

舍人給事中左右司郎官

未改官制前左右司郎中為階官無職掌

郎中各

一人員外郎各一人凡四員掌舉諸司之綱紀號為都

司亦曰左右曹元豐六年諸司置御史房主行彈劾御

史按察失職建炎三年以軍興多事復置檢正二員

一員

禮刑兵一員戶刑

位序在左右司上四年罷隆興元年詔尚書

省吏兵房三省樞密院機速房尚書省刑戶工房三省樞密院看詳賞功房尚書省禮房令左右司分房書擬其中書門下諸房令檢正書擬又有詔左右司郎中各差一員減罷二員左司書擬吏戶禮機速房右司書兵刑工賞功房文字後以右司掌刑房事任為劇乃置二

員

餘見尚書左右司郎中門

文獻通考卷四十九

欽定四庫全書薈要卷九千三百七十

史部

文獻通考卷五十

鄱陽馬端臨貴與著

職官考四

門下省

門下省後漢謂之侍中寺

嘉平六年改侍中寺

晉志曰給事黃門

侍郎與侍中俱管門下衆事或謂之門下省至齊亦呼侍中為門下領給事黃門侍郎公車太學太醫等令丞

及內外殿中監內外驛驢廐散騎常侍給事中奉朝請

駙馬都尉等官梁門下省有侍中給事黃門侍郎四人

掌侍從賓相盡規獻納糾正違闕監合嘗御藥封璽事

後魏尤重北齊門下省掌獻納諫正及司進御之職有

侍中給事黃門侍郎各六人統左右局

左右局掌承華閭內諸事

尚

食

知御膳

尚藥

主御藥

尚衣

主御衣服

殿中

領殿中監察駕前奏引行事制諸修補東

耕則進邦事
隋改為殿內

凡六局隋門下省有納言二人給事黃門

侍郎四人

煬帝三人

及散騎常侍諫議大夫等官並掌陪從

朝直兼統六局開皇三年罷門下省員外散騎常侍員

煬帝即位加給事員廢帝侍諫議等官又改殿內省隸

門下省唐龍朔二年改門下省為東臺咸亨初復舊至

武太后臨朝光宅初改為鸞臺神龍初復舊

聖歷三年四月勅別

勅賜物中書門下省官正三品唯二品四品五品開元七年八月初勅中書門下厨新料破用外餘有宜分取

開元元年改為黃門省五年復舊有侍中二人黃門侍

郎二人給事中四人左散騎二人諫議大夫四人典儀

二人起居郎左補闕左拾遺各二人城門郎四人符寶

郎四人弘文館校書二人其餘小吏各有差

宋制門下省在正陽門外西面北廊掌受天下之成事
審命令駁正違失受發通進奏狀進請寶印凡中書省
畫黃錄黃樞密院錄白畫旨則留為底及尚書省六曹
所上有法式事皆奏覆審駁之給事中讀侍郎省侍中
審進入被旨畫聞則授之尚書省樞密院即有舛誤應
舉駁者大則論列小則改正凡文書自內降者著之籍
章奏至則受而通進俟頒降分送所隸官司凡吏部擬

六品以下職事官則給事中校其仕歷功狀侍郎侍中引驗審實察非其人則論奏凡遷改爵秩加叙勲封四選擬注奏鈔之事有舛誤退送尚書省覆刑部大理寺所斷獄案審其輕重枉直不當罪則以法駁正之國初循舊制以中書門下平章事為宰相之職復用兩制官一員判門下省事官制行始釐正焉凡官十有一侍中侍郎左散騎常侍各一人給事中四人左諫議大夫起居郎左司諫左正言各一人

元祐初左僕射司馬光上言謹按西漢以丞相總百官而九卿分治天下之事光武中興身親庶務事歸臺閣尚書始重而西漢公卿稍以失職矣及魏武佐漢初建魏國置秘書令典尚書奏事文帝受禪改祕書為中書有令有監而亦不廢尚書然中書親近而尚書疎外矣東晉以來天子以侍中常在左右多與之議政事不專任中書於是又有門下而中書權始分矣降及南北朝大體皆循此制唐初始合中書門

下之職故有同中書門下三品同中書門下平章事
其後又置政事堂蓋以中書出詔令門下掌封駁日
有爭論紛紜不決故使兩省先於政事堂議定然後
奏聞開元中張說奏改政事堂為中書門下自是相
承至於國朝莫之能改非不欲分也理勢不可復分
也向日所謂中書者乃中書門下政事堂也唐末諸
司使皆內臣領之樞密使參預朝政始與宰相分權
矣降及五代改用士人樞密使皆天子腹心之臣日

與議軍國大事其權重於宰相太祖受命以宰相專主文事參知政事佐之樞密使專掌武事副使佐之自是以來百有餘年官師相承中外安帖百司長官及諸路監司諸州長吏皆得專達或申奏朝廷或止申中書樞密院事大則中書樞密院進呈取旨降勅劄宣命指揮事小則批狀直下本司本路本州本人故文書簡徑事無留滯神宗皇帝以唐自中葉以後官職繁冗名器紊亂欲革而正之誠為至當然但當

據今日之事實考前世之訛謬刪定重複去其冗長
必有此事乃置此官不必一依唐之六典分中書為
三省令中書取旨門下覆奏尚書施行凡內降文書
及諸處所上奏狀申狀至門下中書省者大率皆送
尚書省尚書省下六曹六曹付諸案勘當檢尋文書
會問事節近則寺監遠則州縣一切齊足然後相度
事理定奪歸着申尚書省尚書省送中書取旨中書
既得旨送門下省覆奏畫可然後翻錄下尚書省尚

書省復下六曹方符下諸處以此文字繁冗行遣迂回近者數月遠者踰年未能決絕或四方急奏待報或吏民詞訟求決皆困於留滯又本置門下省欲以封駁中書省錄黃樞密院錄白恐有未當若令舉職則須日有駁正爭論紛紜執政大臣遂成不叶故自置門下省以來駁議甚少又門下不可得直取旨行雖有駁議必須却送中書取旨中書或不捨前見復行改易又內批文字及諸處奏請多降附三省同共

進呈則門下之官已經商量奏決若後有駁正則為
反復近日中書文字有急速者往往更不送門下省
然則門下一官殆為虛設徒使吏員倍多文書繁冗
無益於事臣等今衆共商量欲乞依舊令中書門下
通同職業以都堂為政事堂每有政事差除及臺諫
官章奏已有聖旨三省同進呈外其餘並令中書門
下官同商議簽書施行事大則進呈取旨降勅劄事
小則直批狀指揮一如舊日中書門下故事并兩省

十二房吏人為六房同共點檢鈔狀行遣文書若有
溢員除揀選留住外並特與減三年出職不及三年
應出職者與減磨勘年限若政事有差失委給事中
封駁差除有不當委中書舍人封還詞頭又兩省諫
官皆得論列則號令之出亦不為不審矣如此則政
事歸一吏員不冗文書不繁行遣徑直於先帝所建
之官並無所變更但於職業微有脩改欲令於事務
時宜差為簡便耳

石林葉氏曰本朝沿集唐官制始用六典別尚書門下中書為三省各以其省長官為宰相則侍中中書尚書令是也既又以秩高不除故以尚書令之貳左右僕射為宰相而左僕射兼門下侍郎以行侍中之職右僕射兼中書侍郎以行中書令之職而別置侍郎以佐之則三省互相兼矣然左右僕射既為宰相則凡命令進擬未有不由之出者而左右僕射又為之長則出令之職自己身行尚

何省而覆之乎方其進對執政無不同則所謂門下侍郎者亦預聞之矣故批旨皆曰三省同奉聖旨既以奉之而又審之亦無是理門下省事惟有給事中封駁而已未有左僕射與門下侍郎自駁已奉之命者則侍中侍郎所謂省審者殆成虛文也元祐間議者以詔令稽留吏員冗多徒為重複因有併廢門下省之意後雖不行然事有當奏稟左相必批送中書左相將上而右相有不同往往

或持之不上或退送不受左相無如之何侍郎無所用力事權多在中書自中書侍郎遷門下侍郎雖名進其實皆未必樂也

致堂胡氏曰古者論一相而止至成王時雖以周公位冢宰然亦與召公同相為左右此尚書之序孔子之言也何者周公不敢自聖獨專相事又將訓後世為人心不同而大賢難得則參錯并用猶驅車猶植屋兼取衆力相輔相正歸於無失而已

矣故自漢以來或置左右丞相或並置三公不拘
一相之文至唐而法意尤密既有左右僕射又有
侍中中書尚書兩令左右丞及以官未及而人可
用者參預朝政而其大綱則俾中書出令門下審
駁分為二省而尚書受成頒之有司當貞觀之時
君明臣忠朝希批政不數年坐致太平其集材並
用之效如此諸葛武侯曰參署者集衆思廣忠益
也若難相違覆曠闕損矣違覆而得中猶棄弊屨

而獲珠玉也嗚呼為君如太宗為臣如武侯公心
望治可為後世法也若棄數百年成規合三省為
一以一相專之而官屬如故略無可否見姓署名
是中書門下之名存而基命駿正之實亡矣豈非
舞文便私之甚哉

按溫公所言以三省同取旨為是蓋主於合也致
堂所言以三省各振職為是蓋主於分也其旨似
異蓋門下審覆之說始於唐然唐以中書門下為

政事堂則已合而為一矣但門下省之官有給事中任出納王命之事有散騎常侍左右司諫任諫爭闕失之事皆所謂覆審而貞觀時太宗又命諫官隨宰相入閣議事有失輒諫則門下省無不舉職之官矣坐廟堂者商訂於造命之初毋或擅權而好勝居糾駁者審察於出令之後不憚糾過以弼違則上下之間始無曠職而三省之設不為具官固不必為宰相者各據一省顯分爾汝然後謂

之稱其職也。蓋元豐官制之行，王珪為首相，蔡確為次相。確奏乞以首相兼門下侍郎，次相兼中書侍郎。其實以唐制有中書造命之說。於是奏事取旨皆次相而首相並不得預。蓋陰傾珪而奪之權。及溫公為門下侍郎，嘗懇確欲數會議，各盡所見。而確終不許。此小人擅權之常態。於是門下省又以審覆駁正為已任。若各逞私意，以為舉職則為中書長官者，執造命之說而必擯門下使不得預。

取旨之權門下長官者執審覆之說而必駁中書
已取旨之事則兩省之分所以使之自為讐敵矣
其實兩省屬官既各有司封駁者則都省共同奏
事取旨施行事有不當而後省留黃繳駁乃不易
之法

侍中

侍中者周公戒成王立政之篇所云常伯任以為左右

即其任也

漢官曰選於侯伯轉補袞闕言其道可常尊
故曰常伯周禮有太僕干寶注云若侍中

秦為侍中

晉志曰黃帝時風后為侍中此皆出於兵家及讖緯之文不足徵也劉昭釋太尉其義詳

矣本丞相史也使五人往來殿內東廂奏事故謂之侍

中漢侍中為加官凡侍中左右曹諸吏散騎中常侍皆

為加官

漢儀注諸吏給事中日上朝謁平尚書奏事分為左右曹

所加或列侯將軍

卿大夫將都尉尚書太醫太官令至郎中

無員將謂郎將以下也自

列侯以下至郎中皆得有此加官

多至數十人侍中中常侍得入禁中

諸曹受尚書事諸吏得舉法漢侍中冠武弁大冠亦曰

惠文冠加金璫附蟬為文貂尾為飾

侍中服則左貂常侍服則右貂金取

堅剛百鍊不耗蟬取居高食潔貂取外勁得而內溫潤此本趙武靈王胡服之制秦破趙得其冠以賜侍中

便繁左右與帝升降舊用儒者然貴子弟榮其觀好至

乃襁抱坐受寵位貝帶脂粉綺襦紈袴鷄冠惠帝時侍中鷄

鷄冠貝帶傳脂粉張辟疆年十五桑弘羊年十三並為侍中鷄思俊切鷄魚奇切鷄鷄似鳳凰神鳥直侍

左右分掌乘輿服物下至褻器虎子之屬蘇則與吉茂同隱於太白

山後則為侍中侍中舊親省起居故謂之執虎子茂見則嘲曰仕進不止執虎子則笑曰誠不能效汝蹇蹇鹿

驅車武帝時孔安國為侍中以其儒者特聽掌御唾壺朝

廷榮之本有僕射一人秦漢以侍中功高者一人為僕射後漢光武改

僕射為祭酒或置或否而文屬少府掌贊導衆事顧問

應對

桓帝末侍中皇蟬參乘問貂璫何法不知所出又問地震云不為災還宮左遷議郎

法駕出

則多識者一人負國璽操斬白蛇劍參乘餘皆騎在乘

輦後獻帝即位初置六人贊法駕則正直一人負璽陪

乘

大駕出則次直侍中護駕正直侍中負璽參乘不帶劍餘皆騎從

殿內門下衆事皆

掌之後選侍中皆舊儒高德學識淵懿仰占俯視切問

近對喻旨公卿上殿稱制秉笏陪見舊在尚書令僕射

下尚書上司隸校尉見侍中執板揖侍中舊與中官俱

止禁中因武帝時侍中馬何羅挾刀謀逆由是出禁外

有事乃召之畢即出王莽秉政侍中復入與中官止禁

中章帝元和中郭舉與後宮通拔佩刀驚上舉伏誅侍

中由是復出外秦漢無定員

蔡質漢儀曰員本八人漢官曰無員侍中舍有八區

論者因言員本八人其省門題尚書寺此孝明帝治於東宮尚書模也

魏晉以來置四人

別加官者則非數

王粲為侍中曹植集贈粲詩曰戴蟬珥貂朱衣皓帶入侍帷幄出擁華蓋

御駕登樓與散騎常侍侍中居左常侍居右備切問近

對拾遺補闕及江左興寧四年桓溫奏省二人後復舊

晉武帝時彭權為侍中帝問侍臣髦頭之義何也權曰秦紀云秦國有奇怪獸觸山截波無不崩潰唯畏髦頭故使持之以衛至尊也又褚翼字謀遠為侍中蘇峻作亂王師敗績火及宮室手抱天子登太極殿峻兵入叱翼令下翼不動曰蘇冠軍來覲至尊軍人豈得逼侵宮禁於是兵士不敢上太極殿峻執政猶以為侍中時鍾雅亦為侍中謀奉天子出投義軍事覺為峻所害又王爽為侍中孝武崩王國寶夜欲開門入為遺詔爽拒之曰皇帝晏駕太子未至

侍中漢代為親近之職魏晉選

用稍增華重而大意不異

晉任愷字元表為侍中萬機大小多管綜之愷中正以社

稷為己任惡賈充之為人不欲久執朝政或為克謀曰愷總門下樞要得與上親接宜故令典選使得漸疎此一都令史事耳九流難精間隙易乘克因稱愷才能宜在官人之職即日以愷為吏部尚書由是侍觀轉稀

武冠絳朝服佩水蒼玉舊遷列曹尚書美遷中領護吏

部尚書宋文帝元嘉中王華王曇首殷景仁等並為侍

中情任親密

王華等每與帝接膝共語貂拂帝手援貂置案上語畢復手插之孝武時侍中何偃

南郊陪乘鑾輅過白門闕偃將副帝反手接之曰朕反陪卿也又宋孝武代選侍中四人並以丰貌王或與謝

莊為一雙阮韜與何偃為一雙常充兼假又謝朓字敬仲宋末為侍中及齊受禪之日朓在直百僚陪位侍中

當解帝璽朓佯不知傳詔曰解璽授齊王朓曰齊自應有侍中乃引枕卧傳詔懼使稱疾朓曰我無疾何可道

遂朝服步出門得車還宅是日遂以王儉為侍中解璽齊高祖曰我若誅之彼遂成名乃廢於家永明中復為

侍中至梁齊侍中功高者稱侍中祭酒其朝會多以美亦為侍中

姿容者兼官

欲以陸慧曉為侍中，以形短小乃止。

永元三年，東昏南郊不

欲親朝士，以主璽陪乘。前代未嘗有

齊有主璽主衣等官。

梁侍中

功高者在職一年，詔加侍中。祭酒與散騎侍郎功高者

一人對掌，禁令此頗為宰相矣。

王訓字懷範，遷侍中。既拜入見，武帝問何敬容

曰：褚彥回。又曰：柳慶遠為侍中，嘗失火，禁中驚懼，帝悉不謝。彥回又曰：柳慶遠為侍中，嘗失火，禁中驚懼，帝悉歛諸門鑰，問柳侍中何在。既至，悉付之。又王峻與謝綸約官至侍中，不復謀仕進。

陳侍中亦如

梁制。後魏置六人加官，在其數。宜都王穆壽、廣平公張

黎並以侍中輔政。北齊侍中亦六人。後周初有御伯中

大夫二人掌出入侍從屬天官府保定四年改御伯為納言斯侍中之職也宣帝末又別置侍中為加官隋又

改侍中為納言置二人煬帝大業十二年又改納言為

侍內

隋氏諱忠故凡中皆曰內

唐初為納言武德四年改為侍中亦

置二人龍朔二年改為左相咸亨元年復舊光宅元年

又改為納言神龍元年復為侍中開元元年又改為黃

門監五年復為侍中天寶元年改為左相

至德初復為侍中自隋至

今皆為宰相舊班正三品大歷二年升為從二品

按令文掌侍從負寶獻替贊

相禮儀審署奏抄駁正違失監封題給驛券監起居注
總判省事

宋制侍中掌佐天子議大政審中外出納之事大祭祀
則版奏中嚴外辦導輿輅詔升降之節皇帝齋則請就
齋室大朝會則承旨宣制告命成禮祭祀亦如之冊后
則奉寶以授司徒以秩高罕除自建隆至熙寧真拜侍
中纔五人雖有他官兼領而實不任其事官制行以左
僕射兼門下侍郎行侍中職別置侍郎以佐之元豐寄

祿為開府儀同三司

容齋隨筆論三省長官

見中書令門

侍郎

門下侍郎秦官有黃門侍郎漢因之

劉向與子歆書曰今若年少得黃門

侍郎要處也

與侍中俱管門下衆事無員郊廟則一人執蓋

臨軒朝會則一人執麾凡禁門黃闥故號黃門其官給

事於黃闥之內故曰黃門侍郎初秦漢別有給事黃門

之職

楊雄為給事黃門

後漢併為一官故有給事黃門侍郎掌

侍從左右給事中使關通中外及諸王朝見於殿上引

王就座無員屬少府

又漢舊儀曰屬黃門令

日暮入對青瑣門拜

故謂之夕郎

宮闈簿曰青瑣門在南宮衛璫注吳都賦曰青瑣戶邊青鏤也

獻帝初即

位置侍中給事黃門侍郎員各六人出入禁中近侍帷

幄尚書事後改給事黃門侍郎為侍中侍郎去給事黃

門之號旋復故初誅黃門後侍中侍郎出入禁闥機事

頗露由是王允乃奏比尚書不得出入不通賓客自此

始

荀悅為黃門侍郎郭况以后弟

魏晉以來給事黃門

侍郎並為侍衛之官員四人

山公啓事曰黃門侍郎和嶠最有才可為吏部郎詔

曰欲令在左右更求其次

宋制武冠絳朝服多以中書侍郎為之齊

亦管知詔令呼為小門下梁增品第與侍中同掌侍從
儼相威儀盡規獻納糾正違闕監合嘗御藥封璽書陳

制亦然後魏亦有

崔光為黃門侍郎未嘗留心文案唯從容論議參贊大政

北齊置

六人所掌與侍中同後周天官府置御伯下大夫二人

武帝改為納言下大夫隋六人屬門下省至煬帝減二

人而去給事之名

煬帝初嗣位猶以張衡為給事黃門侍郎初劉行本為黃門侍郎文帝嘗

怒一郎於殿前答之行本進諫帝不顧行本乃正當上前曰陛下不以臣不肖置臣左右豈得輕臣而不顧乃置笏於地而退上唐龍朔二年改黃門侍郎為東臺侍謝之而原所答者

郎咸通元年復舊光宅元年改為鸞臺侍郎神龍元年

復舊天寶元年改為門下侍郎

至德中復舊舊制正四品至大歷三年又改為

門下侍郎升從三品

員二人掌侍從署奏抄駁正違失通判省事

若侍中闕則監封題給驛券

宋制侍郎掌二侍中之職省中外出納之事大祭祀則前導輿輅詔進止大朝會則授表以奏祥瑞冊后則奉

節及實位與知樞密院同知樞密院中書侍郎尚書左
右丞為執政官元豐官制行以尚書左僕射兼復置門
下侍郎一員以代參知政事中興後宰相罷兼復改門
下侍郎為參知政事

按以宰相而兼他官本非令典唐制所謂反輕宰
相之體是也然時方用兵則兼節度使崇儒學則
為大學士急財用則為鹽鐵轉運使蓋以國家方
重其事而以宰相提綱則下不敢以泛泛之司存

視之猶有說也至於三省則俱為政本之地無所
不統長官則宰相所謂中書門下同平章事是也
佐官則參知政事是也今元豐改官制既以中書
門下同平章事為左右僕射參知政事為中書門
下侍郎尚書左右丞矣而復以左僕射兼門下侍
郎右僕射兼中書侍郎則是既自有佐官而復以
長官兼之贅尤甚矣蓋神宗必欲復唐三省之職
而蔡確以有中書造命之說已為次相兼中書侍

郎王珪為首相兼門下侍郎實欲陰擯珪於門下使不得與造命取旨之事苟以便其專政之私而不復顧體統名稱之不順也

給事中

給事中加官也秦置漢因之所加或大夫博士議郎掌

顧問應對位次中常侍侍中黃門無員

漢官表曰凡侍中左右曹諸吏

散騎中常侍皆加官也

諸給事中日上朝謁平尚書奏事分為左

右曹以有事殿中故曰給事中漢東京省魏代復置或

為加官或為正員晉無加官亦無常員在散騎常侍下

給事黃門侍郎上武冠絳朝服宋齊隸集書省梁陳亦

掌獻納省諸聞奏後魏無員北齊亦屬集書省凡六十

人後周天官之屬有給事中士六十人掌理六經給事

左右其後別置給事中在六官之外隋初無至開皇六

年始詔吏部置給事郎

凡置八郎說在爵命篇

煬帝乃移吏部給

事郎為門下之職位次黃門下置員四人以省讀奏案

唐武德三年改給事郎為給事中後定為四員龍朔二

年改為東臺舍人咸亨元年復舊常侍從讀署奏抄駁
正違失分判省事若侍中侍郎並闕則監封題給驛券
前代雖有給事中之名非今任也今之給事中蓋因古
之名用隋之職

宋淳化四年詔給事中凡制勅有所不便準故事封駁
九年詔停給事中始以封駁司隸銀臺元豐官制行給
事中始正其職而封駁司歸門下又詔給事中許書畫
黃不書草著為令元祐元年門下中書言後省修成所

有省曹寺監條貫以門下中書後省為名從之六年詔

駁正事赴執政稟議給事中韓忠彥言朝廷之事執政
所行職當封駁則已與執政異當求決於上尚何稟議
之有詔從之紹聖四年葉祖洽言兩省置給舍廟堂設
施得以更相驗今使舍人兼封駁則給事職廢詔特旨
書讀不回避餘令互書元符三年曾肇言門下駁正中
書違失近給事中封駁中書錄黃令舍人書讀隳壞官
制宣和元年張叔夜言命令之出中書宣奉門下審讀

尚書領行而密院被旨亦錄付門下省神宗制也今急
速文字不經三省諸房以空黃先次書讀則審讀殆成
虛設乞立法禁從之元豐寄祿為通議大夫建炎間因
舊制置門下後省以給事中為長官四員為額

紹興二年韓世

忠賞功文字給事中賈安宅除工部侍郎門下後
省闕官乃詔檢正李與權書讀此事亦前所未有

岳氏愧郊錄曰唐李藩在瑣闥以筆塗詔謂之塗
歸國朝嚴重此制銀臺既設封駁二字亦許繳奏
元豐改官名門下省則有給事中中書省則有中

書舍人然中興以後三省合為一均為後省封還
或同銜則曰未敢書讀書行否則析之其辭止此
而已珂按典故元祐四年五月乙酉權給事中梁
燾繳蒲宗孟知虢州及胡宗回范鍔孫升杜天經
等放罪罰金指揮其駁文皆曰所有錄黃謹具封
還伏乞聖慈特付中書省別賜取旨施行語意乃
與今異以時考之蓋官制既行分省治事謹審覆
揆議之訓故其制如此耳然元祐之初司馬文正

光已嘗乞合三省則是道揆雖一職守仍分至如合二府於一堂列兩省於同局則固不必為是區別斯亦南渡簡易之制也

散騎常侍

散騎常侍自秦置散騎又置中常侍散騎並乘輿

並音步浪

切騎而散從無常職

後中常侍得入禁中皆無員漢因之並加官

說在侍中篇

散騎有常侍侍郎與侍中黃門侍郎後漢中初

省散騎而中常侍改用宦者魏文帝黃初初置散騎合

於中常侍謂之散騎常侍後用士人始以孟達補之久

次者為祭酒

孟達字子度自蜀降魏魏文帝善達之姿才容觀以為散騎常侍

散騎常

侍掌規諫不典事貂璫插右騎而散從又有員外者因

曰員外散騎常侍晉太始中令員外散騎常侍二人與

散騎常侍通員直因曰通直散騎常侍亦武冠右貂金

蟬絳朝服佩水蒼玉

山公啓事曰郗詵才志器局當為黃散黃散謂黃門侍郎及散騎常

侍又曰散騎常侍闕當取素行者補之遂舉郗詵又阮孚字遙集為散騎常侍嘗以金貂換酒為所司彈糾帝宥之又曰賈充為常侍後改常侍為侍中未詳其義散騎常侍黃門侍郎共平尚書奏事雖隸門下

而別為一省

潘岳云寓直散騎省

自魏至晉共平尚書奏事東晉

乃罷之而以中書職入散騎省故散騎亦掌表詔焉

傳玄

為散騎常侍與皇甫陶俱掌直諫又華嶠字叔駿加散騎常侍班同中書寺為內臺中書散騎著作及理禮音

律天文數術南省文章門下撰集皆典掌統之

宋置四人屬集書省齊散騎侍

郎通直散騎侍郎員外散騎侍郎並為直書省職而散

騎常侍為東省官

其二衛四軍四校為西省官說在將軍總叙篇周盤龍自平北將軍為散

騎常侍武帝戲之曰卿若貂蟬何如

貂蟬對曰此貂蟬從兜鍪中出耳散騎常侍通直散

騎常侍員外散騎常侍舊為顯職與侍中通官其通直

員外用衰老人士故其官漸替宋大明中雖革選比侍

中而人情久習終不見重尋復如初梁謂之散騎省天

監六年詔又革之

六年詔曰在昔晉初仰惟盛化常侍侍中並參帷幄員外常侍持為清顯

可分門下二局委散騎常侍侍中並侍帷幄書案奏分曹入集書通直常侍本為顯爵員外之選宜參舊准入

數依正員格

自是散騎視中丞通直視侍中員外視黃門郎

然而常侍終非華胄所悅常侍亦四人功高者一人為

祭酒與侍中功高者一人對掌禁令糾諸逋違陳因梁

制後魏北齊皆為集書省掌諷議左右從容獻納領諸

散騎常侍侍郎及諫議大夫給事中等官兼以出入王

命位在中書之右

魏高祖謂散騎常侍元景曰卿等自在集書閣省逋墮致使王言違滯起

居不脩又宋弁為散騎常侍遷右將軍領黃門弁屢讓高祖曰散騎位在中書之右常侍者黃門之庶兄領軍侍二衛之假攝不足空其資叙為第三清

明毫為常侍加武勇將軍

進曰臣本官常侍是第三清今授武勇其號至濁

北齊常侍定限八員如金紫

光祿大夫隋諸散騎官並屬門下省凡歷代散騎官有

郎騎常侍

漢書有之顏師古曰官為郎而常侍以侍天子故為郎騎常侍

散騎常侍散

騎侍郎

魏初與散騎常侍同置

員外散騎常侍

魏末置齊梁用人卑雜又朱异為員

外常侍侍中中領軍中書舍人四職並驅鹵簿近代未
之有也又賀琛字國寶遷員外散騎常侍舊尚書尚座
無貂自
琛始
員外散騎侍郎
晉武帝置晉代名家身有國制
若起家多為員外散騎侍郎

通直散騎常侍

按魏末散騎常侍又有在員外者晉太
始十年武帝使二人與散騎常侍通員

直故謂之通直散騎常侍齊梁微輕北齊張景仁除
通直散騎常侍及奏御筆點除通直字遂為正常侍通

直散騎侍郎

初晉武帝置員外散騎侍郎及太興中元
帝使一人與散騎侍郎通直故謂之通直

散騎侍郎按歷代常侍或有員外者或有通直者故史
傳中謂員外散騎侍郎或單謂之員外郎謂通直散騎
侍郎或單謂之通直郎其非員外及通直者
或謂之正員散騎侍郎或單謂之正員郎
唐貞觀二

年制諸散騎常侍皆為散官從三品後悉省之貞觀十

七年復置為職事官始以劉洎為之其後定制置四員屬門下掌侍從規諫顯慶二年遷二員隸中書遂分為左右

左屬門下右屬中書左散騎與侍中左
右散騎與中書令右貂謂之八貂

龍朔二年

改左右散騎常侍為左右侍極咸亨元年復舊

宋散騎常侍不常置與諫議起居司諫正言皆附兩省

班籍通謂之兩省官

左散騎常侍隸門下省右隸中書省皆掌諫諍虛不除人亦為檢校

官

石林葉氏曰元豐既新官制四十年間職事官未

有不經除者惟御史大夫左右散騎常侍至今未
嘗除人蓋兩官為臺諫之長非宰執所利故無有
啟之者或云元豐末黃安中為中丞久次神宗欲
擢為常侍會寢疾不果崇寧中朱聖予為中丞嘗
請除二官竟不行

按神宗之初行官制也嘗諭輔臣欲取新舊人兩
用之又曰御史大夫非司馬光不可蔡確進曰國
是方定願少遲之王珪亦助確乃已蓋臺諫之長

上意必欲取負天下重名如溫公者居之尤非小人之便故遂終不除人也

諫議大夫

秦署諫議大夫掌論議無常員多至數十人屬郎中令

至漢武帝元狩五年始更置之

劉輔以美才擢為諫議大夫成帝欲立趙婕妤

為皇后輔上書諫書奏收輔繫掖庭秘獄又王褒貢禹王吉匡衡何武夏侯勝嚴助等並為之後漢增

諫大夫為諫議大夫亦無常員二漢並屬光祿勳

韋彪字孟

達上疏曰諫議之職應用公直之士通才審正有補益於朝者今或從徵試輩為之不宜也自後則無聞矣

後魏亦曰諫議大夫北齊有七人屬集書省後周地官

府有保氏下大夫規諫於天子蓋比其任也隋亦曰諫

議大夫置七人屬門下省煬帝廢之唐武德五年復置

屬門下

王珪為諫議大夫嘗有諫論太宗稱善遂詔每宰相入內平章大計必使諫官隨入與聞政事

龍朔二年改諫議大夫為正諫大夫

武后臨朝垂拱二年六月置匭四區

共為一室列於朝堂東方春色青有能告以養人及勸農可投書於青匭銘之曰延恩南方夏色赤有能正諫論時政之得失可投書於丹匭銘之曰招諫西方秋色白有能自陳抑屈可投書於素匭銘之曰申寃北方冬色玄有能謀智者可投書於玄匭銘之曰通玄宜令正諫大夫補闕拾遺等一人充使知匭事每日所有投書

至暮即進天寶九載三月改匭為
獻納至德元年十月復改為匭
後又置諫議大夫屬

中書

延載元年山人武付方
拜正諫大夫平章事

開元以來廢正諫大夫復

以諫議大夫屬門下凡四人掌侍從規諫

至德元年九月制諫議太

夫論事自今以後不須令宰相先知乾元二年四月兩
省諫官十日正封事直論得失無假文書冀成殿最用
存沮勸大歷七年二月其四員外內供奉不得過正員
數貞元四年五月分為左右各四員其右諫議隸中書
省

宋承五代之弊官失其守官職差遣纔以定俸入而不

親職諫議大夫司諫正言皆須別降敕許赴諫院供職

方為諫官亦有領他職而不與諫諍其由他官領者帶知諫院以兩省官充掌供奉諫諍凡朝廷闕失大則廷議小則上封明道初陳執中為諫官屢請置院於是以門下省為諫院徙舊省於左掖之西

司馬光有題名記

真宗天

禧元年詔兩省置諫官六員不兼職務後復兼職如故

詔曰朕大庇蒸民隆興至治彌綸闕失交屬於庶僚寤寐忠規屢頒於明詔雖曾虛佇未協翹思夫惟諫諍之臣迨於風憲之列倘因循而自默則獻納以曷觀况朕躬覽萬機日披封奏詳延百執素靡漏言舉職徇公有何所避保身藉口詎至於斯將戒慢官用申誕告仍加優異以勸傾輸自今兩省置諫官六員御史臺中丞知

雜推直外置御史六員並不兼領職務每月添支錢十
五貫三年內不得差出其或詔令乖當官曹涉私措置
失宜刑賞踰制賦斂繁暴獄犴稽留並令諫官奏論憲
臣彈舉每月湏一員奏事或有急務亦許非時入對雖
言有過當必示曲全若事難顯行即令留內但不得潛
為朋附故作中傷其諫官仍於諫院或兩省內選擇廳
事量置什器候及三年或屢有章疏實能裨益特越常
例別與升選苟或職業無聞公言罔覩移授散秩仍遣
監臨戴念古賢不忘忠諫雖逢暴怒尚靡諂辭今則冲
人渴聞讜論開懷而待好爵是縻是為不諱之朝豈有
犯顏之慮黜陟之典斷在於必行語默之端亟從於自擇更資宰府宣布周行

慶歷初詔除諫

官毋得用見任輔臣所薦之人元豐寄祿為大中大夫
始正名左右諫議大夫為諫垣之長專言責焉左隸門

下右隸中書同掌規諫凡朝政闕失大臣至百官任非
其人皆得諫正靖康元年詔宰執毋得薦舉臺諫當出
親擢立為定制建炎三年詔諫議大夫不隸兩省別置
局於後省之側許與兩省官相見議事以登聞檢鼓院
專隸焉又詔臺諫言事官係非時上殿不合在輪對條
具之數紹興三年曾統言本朝多以諫議兼記注且聽
直前奏事元豐始不任諫列然亦許直前頃者權臣用
事言路壅塞詔依元豐舊制

容齋隨筆論諫官與臺官舊不相見事

見御史臺門

紹興間致堂胡氏寄政府書曰古者人臣皆得進諫於其君後世專設一職既已乖謬居是職者又多以立異為心撓亂政事人君難於盡從故員多不備難於盡廢故姑設一二人比諸餽羊惟臺官亦然方祖宗時充臺諫之選者皆天下望士或中外踐更已久無所不知故能有補後世乃以新進利口為之宜其觀望喋喋而莫可遏也然事有隨

時官與世建方漢光武唐太宗馬上經營之日與
齊小白秦苻堅專任一相以成霸業之時未嘗聞
有臺諫官喋喋於其旁誠以三軍五兵之運伐人
制勝之謀不可以告人亦非人所能與故也及夫
平定之後法制既立則必設置臺臣使糾違犯開
通諫諍以補闕失時勢當然耳今宜以給事中兼
諫大夫中書舍人兼司諫左右史兼正言政事下
省便可救正諫員既廣院額可廢而御史臺只合

彈擊官邪與夫壞敗已成憲度者至於政事得失
專責大臣與諫者若夫四方訴訟自有州縣監司
臺省節次又不得直則有登聞檢鼓兩院存焉憲
臺亦非受訟之所也如此則治有體統朝廷增重
國勢不搖可以言治

按以立異為心以利口為能此諫官之所以使人
厭也況處多事之時運籌決勝其機貴密其發貴
果尤不宜使好異利口者喋喋其間然欲遂從而

廢其官則過矣昔司馬溫公言凡擇言事官當以
三事為先第一不愛富貴次則重惜名節次則曉
知治體此乃名言誠使為諫官皆得如此之人何
至如致堂所言哉

起居

起居周官有左右史記其言事蓋今起居之本

動則左
史書之

言則右史書之
左史記言右史記動

漢武帝有禁中起居後漢馬皇后撰

明帝起居注則漢起居似在宮中為女史之任又王莽

時置柱下五史秩如御史聽事侍傍記其言行此又起居之職自魏至晉起居注則著作掌之其後起居皆近侍之臣錄記也錄其言行與其勲伐歷代有其職而無其官後魏始置其起居令史每行幸宴會則在御左右記錄帝言及宴賓客訓荅後又別置修起居注二人以他官領之北齊有起居省後周有外史掌書王言及動作之事以為國志即起居之職又有著作二人掌綴國錄則起居注著作之任自此而分也至隋初以吏部散

官及校書正字有叙述之才者掌起居之職以納言統之至煬帝以為古有內史外史今著作如外史矣宜置起居官以掌其內乃於內史省置起居舍人二員次內史舍人下

庾自直崔濬祖虞南蔡允恭等皆為此職

唐貞觀二年省起居舍

人移其職於門下置起居郎二人顯慶中復於中書省

置起居舍人遂與起居郎分掌左右龍朔三年改為左

右史

郎為左史舍人為右史

咸亨元年復舊天授元年又為左右

史神龍初復舊每皇帝御殿則對立於殿

左郎右舍人矣

有命

則臨陛俯聽退而書之以為起居注凡冊命啟奏封拜

薨免悉載之史館得之以撰述焉

令狐德棻呂才蕭鈞
褚遂良上官儀李安

期顧允高智周張大素凌季友
等並以起居皆有名之賢者

宋沿唐制起居郎隸門下起居舍人隸中書號小兩省
官皆為虛名不典本省事而典職者自號修起居注凡
二人多以館閣官兼掌更番侍立於崇政殿又從行幸
以備記錄國初院在皇城外但關敕送史館而不撰集
淳化五年史館修撰張昞上書請依故事復左右史之

職為起居注乃詔從置院於禁中命起居舍人史館修撰梁周翰秘書丞直昭文館李宗諤掌起居郎舍人事通撰注記凡宣徽客省四方館閣門御前忠佐引見司制置進貢辭謝游幸宴會賜賚恩澤之事五日一報翰林麻制德音詔書敕榜該沿革制置者門下中書省封冊告命進奏院四方官吏風俗善惡之奏禮賓院諸蕃職貢宴勞賜賚之事並十日一報吏部文官除拜選調沿革兵部武臣除授司封封建考功謚議行狀戶部土

貢旌表州縣廢置刑部法令沿革禮部奏賀祥瑞貢舉
品式祠部祭祀畫日道釋條制太常雅樂沿革禮院禮
儀制撰司天風雲氣候祥異證驗宗正皇屬封建出降
宗廟祭享制度並月終而報鹽鐵金穀增耗度支經費
出納戶部版圖升降歲終而報每季撰集以送史館
是歲令審刑院奏覆有所諭旨可垂戒者並錄送院熙
寧初詔諫官兼修注者因後殿侍立許奏事元豐中兼
修注王存乞復起居郎舍人之職使得盡聞明天子德

音退而書之神宗亦謂人臣奏對有頗僻讒慝者若左

右有史官書之則無所肆其姦矣故事左右雖日侍立

而欲奏事必稟中書俟旨存因對及之乃詔雖不兼諫

職者亦許直前奏事五年官制行罷修注而郎舍人始

專其職

四朝志

起居郎舍人掌記天子言動御正殿則俟

於門廡外便殿則侍立行幸則從大朝會則對立於殿

下螭首之側凡朝廷命令赦宥禮樂法度損益因革賞

罰勸懲羣臣進對文武臣除授及祭祀燕享臨幸引見

之事四時氣候四方符瑞戶口增減州縣廢置皆書以

授著作官六年詔左右史分記言動元祐元年仍詔不

分七年詔邇英閣講罷續有留身奏事者許侍立紹聖

元年中丞黃履言所奏或干機密難令旁立乃止會要隆

興元年胡銓奏記注之失有四一人主不當觀史國朝

梁周

翰以起居注每月進御慶歷中歐陽修乞更

二立非其

地國朝記注之臣立於座後歐陽修謂當人主言動而

書乃立於前修罷復故今乃立於殿之東南隅言動

不聞乞復歐

三前殿不立

國朝古制前後殿皆侍立而

陽修之制

前殿不立又左右司分日而

立無言動之異欲乞於前後殿皆分日侍立

四奏不直前

臣欲直前奏事閣門以不預牒却之

嘗預牒矣又以無班為詞是雖有直前名而無可奏之時矣乞左右史奏事直前不必預牒及有無班次為拘也

詔前殿依後殿侍立餘並依舊制淳熙間羅春伯

黜

自戶部員外郎除右史避曾祖諱以太常少卿兼侍立修注官其後兩史或闕則降旨以某人權侍立官蓋自此始元豐寄祿起居舍人為朝散郎

拾遺補闕

補闕拾遺武太后垂拱中置補闕拾遺二官以掌供奉

諷諫天授二年各增置通前為五員三年舉人無賢愚

咸加擢用高者試鳳閣侍郎給事中次或試員外郎侍

御史補闕拾遺校書郎當時頗為濫雜著於謠誦

謠曰補闕

連車載拾遺平斗量杞推侍御史掬脫校書郎

自開元以來尤為清選左右補

闕各二人內供奉者各一人左右拾遺亦然

兩省補闕拾遺凡十

二人左屬門下右屬中書

宋端拱初改左右補闕為左右司諫左右拾遺為左右

正言是時太宗欲令諫官修職故詔改其官後亦有兼

他官不供諫職者真宗天禧初詔兩省置諫官不兼職
用劉燧魯宗道為左右正言元豐肇新官制左右司諫
各一人正七品左右正言各一人從七品同掌規諫諷
諭凡朝廷有闕失大事則廷諍小事則論奏分隸兩省
寄祿左右司諫為朝奉郎左右正言為承議郎中興初
詔不隸兩省紹興二年復淳熙十五年兵部侍郎林栗
奏言諫諍之官尚有闕員居其位者往往分行御史之
職至於箴規闕失寂無聞焉願依唐制置拾遺補闕左

右各一員專掌諫諍不許糾彈從之以許深父薛象先
充其職班著在監察御史之上光宗立復省

典儀

典儀二人唐置周禮秋官有司儀上士八人中士十六
人蓋此典儀之任齊職儀云東宮殿中將軍屬官有導
客局置典儀錄事一人掌朝會之事梁有典儀之職未
詳何曹之官掌唱警唱奏之事朱服武冠陳亦有之後
魏置典儀監史闕其員及所掌唐初隸門下省初用人

皆輕至貞觀李義府為之是後常用士人領贊者以知贊唱之節及殿庭版位之次

城門郎

周禮地官有司門下大夫一人上士四人並城門郎之任初漢置城門校尉員一人掌城門屯兵有司馬及丞各一人十二城門候各一人出從緹騎百二十人

緹徒兮切

蓋兼監門將軍之職魏因之晉制銀章青綬絳朝服武冠佩水蒼玉元帝省之宋齊俱以衛尉掌宮城屯兵及

管鑰之事梁陳二代依秦漢以光祿卿等掌宮殿門戶
亦無城門之職後魏置城門校尉北齊衛尉寺統城門
寺置城門校尉二人掌宮殿城門并諸倉庫管鑰之事
後周地官府置宮門上士一人下士一人掌皇城十二
門之禁令蓋並在其任隋氏門下省統城門局校尉二
人煬帝大業三年又隸殿中省十二年又減一人後又
改校尉為城門郎置四人又隸門下省唐因之

符寶郎

周官有典瑞掌節二官掌瑞節之事

瑞節信也典瑞屬春官掌節屬地官

秦漢有符節令丞領符璽郎

昭帝幼冲霍光秉政殿中夜驚光召求符璽符璽郎

不肯授光奪之郎按劍對曰臣頭可得璽不可得也光壯之增秩二等

文帝二年初與郡

守為銅虎符竹使符之制又皆屬焉

應劭曰銅虎符第一至第五國家當

發兵遣使者至郡合符符合乃聽受之竹使符者以竹箭五枚長五寸鐫刻篆書第一至第五類師古曰符與郡守各分其半右則留京師左以與之後漢有符節令兩梁冠位次御史

中丞別為一臺而符節令一人為臺率掌符節之事屬

少府魏與後漢同晉太始元年省并蘭臺置符節御史

掌其事宋與晉齊蘭臺有主璽令史以治書侍御史領之梁陳御史臺亦有符節令史後魏御史臺領符節令符節令領符璽郎中北齊有符節署餘與後魏同

符節令一

人符璽郎中四人

後周有主璽下士掌國璽之藏隋初有符璽

局置監二人屬門下省煬帝改監為郎唐因之長慶三

年改為符寶郎神龍初復為符璽郎開元初復為符寶

郎

天寶五載六月敕玉璽既為寶宜為璽書十載正月改傳國寶為承天大寶

其符節並納

於宮中有行從則請之郎掌諸進符寶出納幡節也

弘文館

唐武德初置脩文館後改名弘文館神龍初改為昭文
二年又却為脩文尋又為昭文開元七年又詔弘文焉
儀鳳中以館中多圖籍未詳正委學士校理自垂拱以
來多大臣兼領館中有四部書自貞觀初褚亮檢校館
務學士號為館主因為故事每令給事中一人判館事
校書二人學生三十人

宋改為昭文館

以弘犯宣祖諱

大學士一人以宰相充學士直

學士不常置直館以京朝官充掌經史子集四庫圖籍
修寫校讎之事判官一人以兩省五品以上充

文獻通考卷五十



總校官庶吉士臣張能照

校對官檢討臣郭寅

謄錄監生臣劉垠